

四庫全書

集部

欽定四庫全書

歸田類稿卷十五

元 張養浩 撰

五言古詩一

古意十首

我夢上寥廓宮殿深綺雲上有龍鳳飛下有虎豹蹲茫  
茫四圍水玉鏡無纖痕坐覺宮殿搖縹渺驚心魂欲下  
客相挽酌我青霞樽前後鳴雲韶左右歌天孫四坐儼

冠佩光爛扶桑暎囑我到塵世膠口慎勿論劃然隕穹  
崖雪屋燈微昏

驅車上崔嵬進寸還退尺極知太行險政爾未遑息我  
僕既已痛我馬亦傷策魂斷猩鼯聲心掉虎狼迹欲迴  
惜前功將往孰引汲林端風雨交谷口雲霧塞惟應徐  
徐行庶免胥顛躓由正莫務捷其到或可必前路方巉  
巖仰視天井窄憂端從中來比山卻平易

有客遠征戍乃在朔漠陰怙恃既云失友于亦俱沈獨

存寡弱妻永蘄持寸心極知形影孤不忍忘遺簪夜織  
侵吳月晨爨掃墜林有時睇層穹悠悠恨彌襟人生果  
奚恃道義扶古今窮微豈為累他日知良金

薄言採蘭芷將以貽遠人遠人天一方相望邈參辰蘭  
芷秋欲萎步繞蒼煙津終朝不盈掬戚戚懷苦辛徒令  
翡翠禽驚逝不我親禽逝可再至人別會何晨惻愴訴  
無所商颺動白蘋

鷓鴣千仞翔所下惟德輝非竹實不食非梧桐不棲竹



實豈恒有梧桐亦云稀所以高世士抱飢守巖扉寥寥  
經濟懷不忍輕發揮朝飲西江流暮采南山薇千駟豈  
難致不義秋毫微寄言時之人慎勿賤布衣

好鳥止庭樹睨睨揚嘉音再三未云已慰我山澤深綏  
飈襲野服起步林之陰仰視離離天悠然動孤吟倏爾  
鳥驚逝寧知出無心

任公坐松頂垂釣橫海鰲芥視三神山咫尺萬里濤鰲  
魚至難必但見雲天高豈無鱸與鮓吾餌不汝挑寧期

毫髮功要使斯世膏此志果終定遲速終相遭

我欲適鄒魯歲晏道阻脩奎文遙相望五彩爛不收孔  
林無曲柯洙泗恒安流春風吹舞雩童輩方詠遊彼樂  
乃如許我志獨未酬徘徊暮雲邊心往形跡留何當生  
羽翰因之閱濟州

美人余所珍睠焉靡從致之人為美何玉體性蘭蕙熙  
熙如陽春着物惟自遂動靜語默間恨有無限意我欲  
相徵逐咫尺霄壤異何時觀清揚滌此塵鄙氣

我有書一函字不類人世雲擁蛟龍翔風飄鳳鸞逝寶  
藏將百齡時時露奇氣上令星斗殷下益山海翠非不  
欲出之將恐反為罪歲晏何所歸自樂諒無媿

寓興和

延祐四年二月余以事至興和凡留百餘日  
寓居城東隅幽閒深迥類隱者所居因得詩  
十首以為他日歸田起本

平昔嗜幽隱未敢聞斯行雖云縻以爵雅負羲皇情茲

來志頗愜若遂林泉盟城居况清寂冲襟澹無營開簾  
納南薰庭草微波生非因客相過竟日無人聲烏衣時  
往還黃耳恬不驚安得幅員廣舉若此境清時陝西嘉  
小有警  
時恐易失孰謂淹邊城

日出未云起枕上聞禽呼緬思金馬門萬騎爭先驅而  
我幸免此日與幽寂俱所准惟一事事已無餘拘或杖  
陟城堞或騎遊郊墟或賞東隣花或閱西家書歸來曲  
枕臥旅牕亦明虛優哉聊復爾詎必山澤居

鉤簾坐觀雨濛濛散如絲彼燕何所欣往來經緯之簷  
風爽毛骨詎惟物蒙滋餘洒寢迫人却避榻屢移從來  
幾風雨今始有此怡乃知寸心靜萬象皆委蛇人生故  
多事安得恒如斯

得子強也書詩以答之

有客附書至封識墨尚新展讀笑良久勸我歸及辰我  
豈不汝懷愛此泉石鄰官事亦既簡又多素心人劉生  
書滿家楊叟酒味醇而况俱好客有假眉不顰緬思霄

壤間實與逆旅均焉往非寄寓奚必家園親置書桃笙  
底且復樂我真

伊人旅他域每每心不舒而我獨誰安起居常晏如政  
餘釋經史既飽行庭除優遊度旦昏瞬息三月餘當其  
未來此咸謂不可居迨其既戾止漸喜與世疎所寓復  
幽僻風景仍清虛況丁大火時爽氣恒襲裾蠅蚋一無  
有雅稱頤病軀為隣地高寒形影忘羈孤書以寄兒子  
無用占蜘蛛

三月二十五日雨

邊雨易風色當春雨恒慳芳菲既遲迴原隰復平寬未  
種聞入土煬煬尋復乾農習多鹵莽畷亦溺晏安豐歉  
付天運畧不人力于我來每病此宿弊無從刊所以逢  
甘澤百倍樂且懽祈祈入薄暮淅淅挾輕寒昀昀既沾  
足穰穰行及觀所以顧歲登惟恐瘵厥官因之為懷土  
賣劍耕家山

登閔忠閣

北三十里為大內

羈思起如擣奮欲飛彼旻於焉一振衣聊以樂我員三  
都鼎足峙二水衣帶分穹窿天罍野浩蕩風披雲新宮  
何鬱然所見勝所聞利聲闕塵市夕彩山明曛羣角散  
泚泚衆翼迴紛紛登高窮邇遐撫事兼悲欣故園定何  
許憑欄重殷勤

夜雨寄呂叔泰

隆隆暑威歇稍稍秋意深豐草漸改色窮林亦蕭森況  
茲風雨夕微鐙翳寒陰潛蛩洩幽語徂鴈遺哀音以我



耿耿懷知子難為心含情睇層昊咫尺猶商參裹飯孰  
子遺載酒孰子斟豈不欲一往畏彼泥潦侵古人道義  
交非惟讓分金斯事久索冥念之恨彌襟願言軌前躅  
尚期勗來今

二月二日雨寄杜希聖

入春不旬浹小雨凡兩作茲晨尤所欣生意際寥廓初  
看兄纖塵尚恨為力弱扶筇立未幾已訝淚花萼神哉  
造化功悠悠諒難度狼戾期在茲殿屎不復作睇雲引

深杯擬勸龍公嚼蕭蕭一簾風搖蕩春陰薄因之成短  
章聊發幽人喙

禮部新鑿蓮池成

春官大宗伯非據恒拳拳云胡舒所憂鑿池納清漣明  
月忽倒掛停雲亦中懸纖鱗泳幽深淨植成芳妍公餘  
為寓目彷彿湖海前未遑范蠡舟聊當陳登田頭白尚  
兒戲自笑復自憐孰知此舉中仕隱乃兩全言念揚州  
鶴其然豈其然

來傳過家同馬克脩總骨晏金線池

皇皇使者車每出每忽遽茲行諒多暇值勝輒少住而  
况父母邦所與多舊故張燕臨芳池人影亂波素華堂  
翳歌雲香玉蘸杯露于于來遠岑歷歷散層樹纍纍泉  
引珠奕奕風起絮二泉名舊聞金線竒屢至未曾遇川妃  
若余誇一縷出容與因知穹壤間靈異固無數寒水乃  
生蠶烈火能浣布滄溟有樓臺弱水不毛羽伊誰亭毒  
司擬欲扣其故題詩池上亭它日記分聚

直省

危松蔭華構，叢卉延清池。雖有聲利喧，吏隱良亦宜。稍多士散忽，忽落景移嚶。嚶草蟲鳴熠，熠螢火馳驚。颺葉蕭瑟淡，月雲迷離夜。澄神慮醒人，杳音塵遲感。茲耿無寐迴廊步，委蛇懷哉百年心。欲語難為辭。

登司天臺同李景山元復初分韻得色字

漱居厭紛厖，升高百憂失。河流耿微明，野燒還故碧。太行望中低，斷處仍雪色。翠華天尺五，金城年萬億。美哉

山河固兩有險與德區區遼與金銅駝幾荆棘開闔看  
煙雲興廢感今昔所恨難久留悲風晚來急

夏日姜氏園亭避暑

赫赫三伏威遲遲六龍轂劇暑將焉逝於彼樂之曲人  
家佳林薄一徑入脩竹牕扉翳深青水石帶微馥魚若  
遊空明花如媚幽獨時於喬木顛瞥見飛來鵲桃源昔  
疑妄歷此方心服詎知虛落間而有無懷俗心隨潭影  
澄詩與禽聲逐此樂且勿竟留待重來續

飲崔氏別墅

駕言徂莽蒼煩抱豁  
日舒佳處尚邈然俯仰已自如行  
行遵大路未覺我馬瘠  
雲林展平遠田苗散數腴奕奕  
荒落煙肅肅幽人廬  
入門恍世異危亭繞芙蓉波影漾  
屋壁禽聲亂庭除  
穹木清夏風遐原澹夕蕪  
幽討起新思雅集存真娛  
羣賢迭詠歌夫豈山陰殊且勿慨陳迹  
萬古皆須臾

登會波樓

吾郡山水窟奇勝聞未嘗於何得全觀茲樓水之陽羣  
峯闢城郭飛棟相頡頏影倒馮夷宮錦亂天孫裳明湖  
一神鏡照萬無留良華鵲乃後驅使我背若芒欲舉酒  
相囑彷彿雙龍翔形勢信絕美求稱慙德涼雖云生長  
茲會少離尋常桑梓尚敬止况乃十二强何當棄官歸  
扁舟永徜徉

大明湖泛舟

肇余復鄉土樹石皆華滋汚彼明湖波倍覺香可卮携

朋訪蓮葉浩浩從何之俯視亂山影與樹相參差商飈  
一披拂夾岸蛟龍嬉舉手欲攬玩復恐陽侯悲平生慕  
天遊不意今有茲赤壁坡仙笛漢陂少陵詩二子孰可  
繼沙鷗弄晴熹

趵突泉

物平莫如水陘阻乃有聲云胡在坦夷起立若紛爭無  
乃滄溟穴漏洩元氣精不然定鬼物搏激風濤驚奇觀  
天下無每過煩襟清茫茫彼區域載物良不輕微水坤



馬浮非天水奚生孰知一脈許而與天地并因之有真  
悟日晏忘濯纓

歸田類稿卷十五

欽定四庫全書

歸田類稿卷十六

元 張養浩 撰

五言古詩二

制中辭吏部尚書

實行諒無有虛譽日以隆三年兩見徵顏厚甲九重將  
行懼違孝欲止還戾忠出處人所難始信此語公吾親  
臥邱壠子亦當同凶何心從吉召去此楸與松潢汙水

孰薦溪澗毛孰供三年非我獨貴賤天下通朝著多英  
髦豈少衰病翁不惟隕士節將恐隳皇風明明方孝治  
應不罪眇躬書此奉來使感泣田園東

遂閒堂落成 至治元年

去春卜斯室余方忝朝聯室成余來歸侶恐非偶然門  
庭頗幽邃花木仍清妍不欣崇柱石所喜遠市廛好山  
動相見流水近在前雖乏晉公勝差比揚雄賢有時萌  
侈心擬欲增數椽築為四小亭飾彼園與田一亭名拙

逸一亭名樂全一亭名九臯一亭名半仙客來縱遊逸  
休息從宴眠顧茲亦云易少緩良有緣物理忌太盛天  
道嫌驟圓殷勤志諸壁留以需他年

田舍早春

邨居久習靜負暄坐依牆兒僮喜相報沙草露微芒余  
老愛生意拾樵衛其傍匪慮牛羊侵第防鷄犬傷因視  
亭中花碎蕾亦綴芳風日漸回律川源泛晴光飛飛簷  
外禽啾啾試新簧乃知春一動萬纍隨悠揚田園有幽

事佳木補斷行東隣移杞梓西家乞松篁雖非老人宜  
且慰邱壑藏悠悠撫清景此外非所望

記綽然亭前花木

淵明曠達士乃慮田園蕪退之崛強人亦喜有屋廬而  
我視二子公卿與臺輿歸來得茲堂偃息權有餘門庭  
足山色田間水縈紆堂前數種春一一品名殊芙蓉錦  
帷幄芍藥金盤盂梧桐翠葆曰牡丹紫雲腴葵榴色爭  
勝梨柿枝相扶海棠梅菊蘭或麗或清癯循環一年內

爛漫無日無最憐兩稚松貞操每起余凜然殿羣卉次第孰敢踰有如吳宮娃布陣庭之隅老子日何事繞玩為踟躕觀物悟盛衰度世忘智愚利害不復齒為要不復途從遊有猿鶴共話惟樵漁人生此樂慳况今許頭顱區區願堅守或能保桑榆

新構草庵

起樓城市中雖麗終塵喧山間一把茅幽勝不可言野意既無隱嵐翠亦滿軒上有華峰雲下有樂水源叢篁

森四周何必籬與藩時出百無慮看守有鶴猿愚者以  
為陋達士忘寒暄隱然太初意晤對常在垣詠茲落成  
詩商聲滿郊原

書綽然亭壁

野亭自成趣旦旦必一臨有時俗務妨咫尺猶商參非  
愛山水秀非喜林樾深其中陳詩書旁列壺與琴鼓琴  
酌我酒既誦且詠吟想前隱居者亦復如我今古人不  
可見賴書得其心後來知我誰搔首雪滿簪幸此可終

老且勿求知音

有示

余出四十而髮有白者今五旬有七殆將瞤  
然每一攬鏡輒為大笑或者疑焉遂賦此詩  
示之

人見白髮愁我見白髮喜為問一世人得此能有幾陸  
展何大癡染之媚女子政使女子憐不悟人衰矣坡仙  
自謂達亦說簪花耻昌黎素樸強併恨及牙齒常思前



輩心要皆怖身死身死人之常縱怖能免彼不如姑舍之登高看雲水

飲田家醉歸

肇余故園復宵夢亦晏如投趾皆春臺夙累久已除有酒畧貴賤見請輒同娛茲晨飲田家翁媪良勤劬呼僮為割鷄催婦仍鱸魚坐我桑柘陰清風來徐徐滿前太古意彷彿羲皇餘雖未無何有已覺春敷腴人生甯之影此酒何可無為樂然多端未必能勝余題詩村舍壁

用託漁樵徒

夏日池上

林深池水綠，倏忽春失妍。繁枝已成陰，推荷亦田田。  
時序不余貸，相趣反手然。歲月既如彼，此生亦堪憐。  
始來髮尚黑，今也雪覆肩。幸此田園佳，為樂忘歲年。  
况有三子朝，夕事歌絃。平生丘壑心，自喜千萬全。  
此福幾人得，嘯傲雲莊前。

邨居重九對菊

秋氣肅邨落衆綠日就枯斯花何不羣當此獨爛如有  
如高世士不為流俗污又如守節臣可託六尺孤目為  
霜下傑綜名諒非虛肇余歌考槃數載山澤居每值三  
徑移朝莫必與俱割席障嚴凝引索圍扶踈未發恒助  
潤既茂頻芟蕪揮鷄恐見傷招蝶使相娛老來百念灰  
為花尚勤劬閒居愛重九我固淵明徒但憐尊屢空坐  
閱佳節徂吾詩亦堪憐笑命兒童扶

田居

性癖喜郊野宅此十載強人云久自厭而我安如常飛  
走咸舒徐耄稚亦善良口不挂人過所語惟稻梁相邀  
坐樹根四顧多牛羊納納眼界闊洒洒心境涼脩脩風  
日幽忽忽身世忘公輸為我拙孟獲威不揚儀秦詎能  
舌趙孟卑欲藏向者豈知此近歲始備嘗嘗疑古之人  
往往比高翔其樂乃如許諒足輕軒裳此詩君試歌六  
合聲洋洋

春日雲錦池即事二首

晴原日融融生意動林木信標芳池邊風生水紋綠聚  
散鷗鷺亂飛出沒鴨爭浴物樂不自知觀者快心目緬惟  
霄壤間何物無所欲泊然風月懷頗覺惟我獨此福嘗  
自量奚啻萬鍾祿夸者難與言但可託樵牧舉頭見青  
山新篇又須錄

樂閒不顧仕昔聞陶令然而我山中居頗覺同前賢出  
門雲水俱入室琴書全筆硯或少倦餘功到農田觀禾  
割深翳行舟扶危妍移石支臥松漑竹疏微泉平生愛

物心乃始遂近年猶勝馮唐老抱恨終綿綿

過龍門

山水何地無雄渾獨朔郡吾元此開基德澤被餘潤我  
來自神京一路翠無盡大峰儼宸居小峰翼趨進劃劃  
戈矛森鬱鬱龍虎奮連斷伏羲爻開合武侯陣值陰水  
墨澍當霽金碧暈石擢九地根泉落半空韻霏嵐近可  
挹聚落遠難認隨行變態殊顧揖不暇瞬如是凡數程  
愈出愈神雋迤邐窮陂陀堆阜尚餘憤長茵塞草鋪碎

錦野花襯行涉人泝流道饗客吹噓方喜脫險危馬首  
又千仞或云龍之門懞恍半疑信兩岸覆瓿如中有怒  
雷震白浪風搜穴蒼苔雨林疊四時闌無關萬古磨不  
磷仰觀毛骨寒闌入精爽茶沉沉飛鳥低泓泓去波迅  
襟喉控全燕琛壁走諸鎮未知神禹手於此曾鑿濬圖  
經不得詳排雲欲天問平生子長遊勝處神每靳豈期  
驛塵邊乃足看山分竒觀自此窮造物諒無蘊書生氣  
空豪疇敢角其峻掬泉滌筆塵吸露當杯醞詩語成轉

九羈愁破迎及大書道傍祠千載寄高興

和元亨之簽事登歷下亭韻

漾漾東岡陂歷歷北山道於河浣煩纓勝處喜同到有  
亭翼穹窿揭以歷下號衰齡怜危攀未免扶且導於時  
方旱乾千里無寸潦憑欄身世忘羣景信天造雲錦相  
縈迴水禽互翔噪邇峰純浸屏遐樹亂排纛天興幾今  
古依舊灤湖隩不見捉月仙嵐秀想應耗悠悠割據人  
誰馴復誰驚緬思牛後羸何若鷄口郤元德仰帝虞凶



威鄙臣寡方來當自圖已往詎庸悼須臾客踵至先歷  
却懷懊雄談激懦柔虎尾欲甘蹈盤飧留衆賓孰謂少  
陵傲茲遊起余多外靜內還躁雲天為增高煙水亦加  
奧蛟龍時嘯吟樵牧任衝冒何當分憲回盍簪續今好

郊行

遠山如遁藏近山如見逼老夫緩策行超遙歷阡陌清  
風動林木浮嵐上巾幘雲霧自遠來忽覺川陸黑霏微  
數點雨顧視衣不溼野色含蒼茫如遊化人國平生喜

清景攬之欲杯吸詎惟可樂飢亦足已沈疾幽閒自能  
年直恐人未識千載桃源春莫謂訪無跡

郊居許敬臣廉使見過

野處欲忘世况乃平昔友寥寥數畝園甘此養衰朽茲  
晨君見過童穉駭而走牙纛明郊原騎從隘巖藪輝光  
生泉石意氣排戶牖握手論夙心相看各自首疊疊及  
經術春春接杯酒嘉我高尚懷一卧七年久自言微親  
老亦欲謝紛糾從仕非不佳其奈多掣肘所以明哲人

往往去之陡此言公近諛彼節余何有本期野老俱孰  
敢達者偶渺渺煙林合浩浩風隧吼涓涓水穿竹忽忽  
日低柳出門俱黯然人影亂田畝

長安孝子賈海詩

天歷元二載西土罹薦飢愚時拜中丞帝曰汝往釐嗽  
嗽三輔間十室九困疲行者總溝瘠居者恒餒而親戚  
自魚肉遑恤父子離鄠縣民有賈竭力奉母慈闔門為  
口四一妻仍一兒操瓢日行丐有得歸母貽不幸值虛

往見母顏怵怩退省百無有滿屋風淒其以湯和糠粃  
進母母不怡曰我幼汝飼非珍即甘飴而汝令我哺以  
我犬豕為况我老且病累汝無歲時子懼白其妻無言  
第頭垂妻曰攜此子從鬻無問誰市呼不見售復歸泣  
漣湏子心救火急兒命累卵危陰攜至他所恩愛從此  
辭解衣縊不殊反為子禁持取盆拔佩刀手足隨紛披  
紿云黃犬炙雅於補衰宜母知口腹美不悟骨肉虧子  
幸母解顏不計妻攢眉余聞驚此言怒詰官失治使民

至如此賑貸猶遲疑即引造行省使細陳憂釐且命出  
兒肉闔府徧示之飭諸相坐前余為失聲悲促掾狀其  
故聞上星夜馳或將復徭役或將表門楣或斥兼金賜  
或選好爵縻上以勸臣子下以安期頤廷議必不爽命  
下會有時昔人有埋子天憐以金遺復有貨視者哀鳴  
走通達亦有棄半途完姪與相隨未聞及所愛萬古猶  
絕竒嗟哉賈生心世俗彼鳴知母以賈為忍無以賈為  
癡子失或再有母失庸可追孰能庭桂惜使我堂萱萎

惟其持是心屠子如屠狸粵從王政圯風靡俗亦漓子  
囊錢賁朽母篋無針錐子妾曳綺羅母裙露膚肌不慮  
親猶天以利為根基不究身何來以貨為宗技於物尚  
爾靳剗乃襁褓私嗟哉賈生心堪為世俗規嘗聞前哲  
言一孝益萬疵孝可包衆善孝可動兩儀孝可神鬼格  
孝可賢聖期能孝斯能忠厥心自親移願彼為人子終  
身誦吾詞

過長白山范文正公書堂

長白何咎堯下有讀書室人云小范老於焉競晨夕蕭  
蕭縣荆榛落落林泉石卷卷往瞻拜赫赫如相及維宋  
慶歷間羣賢麟鳳集孰先天下憂一疏丹心白中朝固  
有人西夏諒難國力言師出凶深慮手滑失炳幾先見  
明韓富有慚德奈何時相隘欲碎和氏璧向非仁廟知  
十載血應碧至今忠義氣高壓萬仞壁所以德業高要  
自辛苦積功臣自古多動為富貴役視公平生心霄壤  
邈相隔但能一善兼亦足十年塞遺容揭日星未覺關

塞黑長歌景行詩風林憾秋色

擬四季歸田樂

春

日月底天廟陽瘴土脈生習習協風來顥顥衆蟄驚農  
人服厥畝薄言事春耕缺堤流漈漈灌木鳴嚶嚶白扉  
颭青帘綠野明丹英蠶婦喜形色牧豎歌傳聲天隨野  
色遙山與吟懷清向來慳一際今者幸四并徜徉子真  
谷萬事秋毫輕



夏

北陸展脩暑薰風薦微涼麥波浩無津細路如橋梁溪  
光林樾潤雨氣桑麻香春聲破幽寂人影來微茫缺垣  
誰所居紅碧相低昂翁媪老瓦盆兒女前捧觴我行適  
見之亦覺心樂康昔聞太古俗今歷華胥鄉向令早知  
此詎使田園荒迷途諒非遠淑景良未央於焉遂平昔  
孤陋庸何傷

秋

黃雲亘郊野農力今有功茲乃民之天治理根其中我  
雖未及粒已覺飢腸充田頭父老過擊壤今歲豐自愧  
無寸積坐享雍熙風秋成既如彼况對菊與楓氣澄天  
宇高心寂塵累空木落山獻體波縮沙留蹤遐興何悠  
悠迅景何怱怱俯仰田舍底或能保初終

冬

歲晏日南至場圃靡所勞告成三務功盈耳康衢謠鴉  
飛嶺外陂虹斷林邊橋將期養疎拙詎厭居寂寥負暄

坐晴簷煦煦春滿袍對山閱吾書懷古酌彼醪此樂天  
所靳何幸及草茅雖非鹿門龐或庶彭澤陶為詩寫幽  
尚刊落華與豪集以貽知音悵望心搖搖

歸田類稿卷十六

欽定四庫全書

歸田類稿卷十七

元 張養浩 撰

七言古詩

題周氏池亭

東風吹樹飄紅雪  
碧雲冉冉迷林樾  
入門高掛四面窗  
水光山色尤奇絕  
恍疑造物同我遊  
參差夢裏金銀闕  
眼中不見無極翁  
閒殺漁溪舊風月

待鳳石

并序

余近得奇石一田兵部師孟同臺掾杜孝先  
過而觀之遂名曰待鳳以其一峯橫出若待  
物來棲者因而名之余嘉其詞雅而意深故  
為之賦

岐山鳳去天為老閒殺蒼梧與瑤草空餘陳迹十文臺  
只辨煙霞說凡鳥朝陽一鳴三千年天地此心何日了  
幾迴夜月琴罷彈彷彿玉音來縹緲雲間九苞望不見

凡上一峯空自好青天倘與達寸誠白日終當見孤矯  
古來奇士志頗同抱玉丘樊不為少子陵坐釣桐江春  
正則行吟楚澤曉白石甯戚半夜歌太華希夷五雲遶  
兵曹命名寓世箴迂叟有詩成腹藁斯名但恐還徒然  
喜極二豪俱悄悄簾影風微篆煙裊

同潘獻臣元復初張子昭高麗寺賞白蓮

雨過琳宮失殘暑竹枝翠濕低蔬圃入門倍覺老眼明  
寒碧一盆花四五不勞掛席雲水鄉望覺西湖在眉宇

蒲搖風影劍舞庭荷瀉露華珠返浦龜魚江海均意適  
蘊藻王公亦心許何年仙子謫帝居驚到維摩散花女  
三生夢斷金沙灘未必香魂遽塵土同來數子俱好事  
爭擲青鳬醉鸚鵡坐中老衲計更奇暗伏毛錐不時舉  
忽聞題詠須即席衆氣勃然齊一鼓或昂或俯或吻鳴  
或蹙或顰或目語或先磨墨務速成或已終篇恥輕吐  
須臾能事俱告畢白璧明珠爛盈廡論功行賞四座譁  
我不能觴甘楚舞從今雅會當日然轉首秋容泣寒雨

萬年松 并引

萬年松生五臺山中長三寸許好事者采置  
諸囊或夾於書簡不計歲時幾何出而水之  
則生意輒復以故土人謂為萬年松日者田  
兵部師孟以數本見貽且曰當作古風一章  
惠我願為篋笥之光乃為之賦

君不見崑崙有栢千仞強青天雷雨蛟龍翔人間斤斧  
日相踵奇材政恐終自戕又不見樗櫟擁腫無何鄉匠



石望知非棟樑孰令枝幹隘寥廓萬古齒冷南華莊豈  
知此樹生寸許不為形累恒蒼蒼貞心勁氣恥土著雖  
遭縛束仍芬芳微根纏糾亂石髮細葉茸密攢鍼芒呼  
童汲井滌烟翠老眼但見參天長傳聞產自金色界貝  
典不載不可詳天花羞落居士室祇樹傾倒梅檀場吾  
家秀碧雅相稱峯巒感縮雲微茫一從植此向幽寂劒  
戟森照光走堂天公豈以我為戲故遣二物陪徜徉  
林崇岳漫霄漢而我亦笑造物狂古今何事非幻景榮

枯美惡均亡羊作詩寄謝子方子何時更為齊東野叟  
分滄浪

秀碧石

有客自和林迴惠怪石拳許峯巒隱然色明  
潤可愛因名曰秀碧遂作是詩答之

有客至自元冥國袖攜一峯元氣濕知我雅有山林思和  
雲持贈曾莫惜嶙峋玉立三寸強意氣歸然厭秋色初疑  
女媧醉墮簪劫火不燒年萬億又疑鼎湖遺寶劒水齧惟

餘半尖碧苔痕剝盡出本真頓覺嵐光異疇昔虛堂畫永  
爐煙微目擊道存真莫逆若令解語儘可師政使不高何  
損德聖門顏子具體微齊國晏嬰才六尺物形固有大小  
殊達觀元無高下隔褰裳欲陟還踟躕一笑詩成山鬼泣

天屏歌

并序

延祐四年予以公糴適中都傳過懷安山中  
得石如版者二文理類林薄根枝柯葉毫分  
縷析高下鬱然微有丹點朱痕隱見其上遂

名其一曰林梢遺照一曰木末餘霞總而名  
曰天屏視彼區區人力為者蓋相萬矣嗚呼  
豈化工之筆山靈不敢私秘因假余以示世  
耶故志其然而系之以歌其詞曰

懷安山高去天尺巖壑尋常烟霧黑豐隆力盡扶不開  
中有神君寫秋色老寬走避營丘潛闕仝愁絕郭熙泣  
物生應亦憤太專故奪英華發之筆塗雲為葉虹為柯  
所記雖殊生意一高者如巨人傲鬼不

始孩頭角已岐嶷繁如秦擁百萬兵疎似周釐十二國  
何年龍虎遺大還數點和煙厭空碧嘗許真宰元無心  
以此推窮知未必無乃羣木陰射透三生石老蜂曾食  
明月光火鏡能褫太陽魄莫靈兩曜彼尚侵野外蒼枯復  
誰惜不然那得面目真自本而梢一無惑怪禽欲止還  
周章寧獸驚看為辟易天生神物豈偶然出示終當需  
有識我來適值春色闌紅雨滿空塵不濕緣道方謳吟  
披荒見奇蹟笑携元氣歸袖裏東海窄呼童汲沆瀣老

手自摩挲黃雲卷盡桂露丹斜日欲沉霞散赤麗水休  
汰金荆山莫搜壁政爾苦索居邂逅得莫逆明窻撫玩  
清晝閒却顧龍沙永為客緬思穹壤間二氣互消息萬  
象從發生不作宋楮刻如何此段奇直欲毫髮析無聲  
詩句誰可續照坐白紅影搖壁雲母祇足俗眼遮錦帳  
何曾奇禍隔梅花捲月坐臥具未許閒愁闌吾室第恐  
夜半六丁排闥入

餘歡堂為許仲文作

燕山元氣橫秋高下有逸士思鳴皋沈冥一世湖海豪  
掉頭不與王公交九鼎腥沸庖鼓刀何如時薦溪澗毛  
紅樓夜月龍鳳簫歡聲輸與康衢謠食魚豈必橫海鰲  
娶妻安用傾城妖鄧林喧鳥止一巢蝸角幾許戈矛操  
平生此意湯雪消人知不知自囂囂有田負郭惟釀醪  
有子教義期無驕赴人急難若已遭奉親不使親知勞  
長安喬木風雪號一庭蘭玉祥雲飄古來大隱多市朝  
烟霞徒起終南嘲召南董生嘗自樵洛中康節誰能招

清風未覺千載遙書堂合賜餘  
懽褰褰余漫為軒冕膠  
辱齊山岳榮纖毫日中奔走影  
亘逃何時並駕塵寰超  
詩成撫卷心忉忉

題李太白登泰山觀日出圖

岱宗鬱鬱天下雄  
謫仙落落人中龍  
茲山茲人乃相從  
氣奪真宰愁豐隆  
玉堂一任雲霧封  
長嘯飛度秦皇松  
夜呼日出滄海東  
再為斯世開鴻濛  
鈞天帝居深九重  
醉舞踏碎青芙蓉  
天孫玉女為斂容  
卻視五岳秋毫同



長鯨一去不復逢乾坤為黑號秋虫當年咳唾留絕峯  
至今樹石生香風我欲追之杳無蹤不意邂逅會此中  
屋梁落月依然空

謝益都宣靖王賜酒

往年帝為民食艱廼生遠謫瓊崖山渴心江湖入吞吐  
無何無路無從攀矧予幽獨久林壑風月齷齪烟霞慳  
茲辰復何辰倅來白雲間田夫走報釋鋤鋤樵青起視  
遺荆管老夫聞言數郊望喜氣千丈虹霓彎汲泉躬洒

苔蘚徑設榻旋啟松雲闥蠹編整頓匣綠綺鶴髦抖擻  
巾白綸肅容導入方丈室雙瓶古錦封爛熳使云賢王  
鎮東土知汝勇退辭朝班惟名惟利世羈鞅自非真悟  
孰能剛公車屢走不一赴冥然物外甘伏跼擬崇退讓  
厲趨競我酒我飲今汝頒無功冒受恐非福令人發媿  
顏為殷金莖玉露天上春奇香驚倒萑與蘭投筇伏地  
再三拜感激殆欲涕泗潛平生自忖非俊才鈍如鴛乘  
拙若鳩有巢拳許不能葺架虹敢效公輸般強為血指

知不免所以袖手避謗訕而人誤此作高尚適足於我  
為惘惘譬如嬰孺本好弄孰知不戲由癡癩伊誰持此  
誑清聽徒使軒蓋臨溪灣西村傳聞駭翁媪東嶮來覩  
扶惇鰥林花動色汀草舞園鳥亦為鳴啾啾一酌破枯  
寂再酌伸皺屨三酌蛻塵世詎止方寸悠然憫白日為  
我永太古為我還何當大稔遍賜酺坐使六合皆懽顏  
鄒枚文雅謝無有但能飲啜寧非頑開筵幸許廁諸叟  
侑席不必歌雙鬟地屏岫回互雲幙天圍園山中聞至

音漱玉溪潺潺只此一朝樂可當十載閒淋瀝青霞裾  
錯落明月環氣復少時盛形改中年孱望望蓬萊宮綵  
緲仙所竄長嘯恣游歷百怪誇神姦阿羅現十身獨鹿  
呈全班堅吾尾幽頰奢比蹤羣蠻大鵬搏扶搖膽落鸛  
鵝鸞倒海騰天吳魂褫犀兕豸鯨不足而翼魚不鱗而  
靄樓臺構半空隱隱如城闌抵掌陽侯癡怒目空爾取  
不解臧至寶珠琲落樹聲珊珊異光天燭龍夭矯翕忽  
變化不可扳湘妃鼓瑟侍姑射姿態不類凡姬嫺下方半

世惡緣重風愆從此或少緩須臾松風作怒忽吹覺但  
見綽然亭下烟波萬頃飛白鷗

詠亭中杏花效韓文公體

曩余京宦恒寡悰程書惟懼日不供春行偶與桃李面  
星火未始能從容居嘗發憤心與口若歸永與花相從  
自酬夙願返田圃幾年種杏尋無蹤或及尺寸鶴見啄  
或甫萌芽鷄交攻東君無乃亦薄惡不使生意閒門鍾  
邇來移植惟兩株自藩自水自土封心虞傍樹奪殿秀

割愛為枅窻前松殷勤發視魯幾時一旦英發喧羣蜂  
大枝矯如奮小枝偻如恭枯不入焦槁麗不淪纖裊晨  
陰慘慘恨何積午霽泚泚色欲鎔風香一榻春漠漠月  
影滿地波溶溶爛遊雖未曲江比諦玩已勝京華逢度  
高僅出牆數尺數芳奚翅花千重行窺坐對有餘喜朝  
吟夕詠不復慵平生愛玉欲成癖邂逅獲此琥與琮有  
時幽鳥鳴其間洋洋盈耳笙竽鏞隋君顛覆為瓊蕊楚  
客憔悴由芙蓉明皇不悟海棠禍鄭穆竟坐芳蘭凶世

俗共重姚魏花推為萬紫千紅宗孰知於世畧無益不  
實而艷徒丰茸吾聞甚美必甚惡政使斗許將安庸滔  
滔泥色古今一奔賞謾使人憧憧彼居塵土已為失況  
當池館繁華衝且如此樹人境外孤高無異楚兩龔獨  
超衆好識者誰雲莊老人鬢鬍鬆逸情搖蕩山水窟新  
詩軒豁風雲胸遮寒不用錦步障取醉自有玻璃鍾山  
中交友殘客無惟漁惟牧惟樵農相過邂逅為絕倒或遺  
巾幘或投筇天公豈悔前日慳著意重染廼爾濃却愁

風雨妬春色，擬欲訪古學。秦龍平生富貴土，直視為花  
如此還憐儂。停毫不覺笑良久，野烟落日昏高壩。

書大唐中興頌後

維君南面非自娛，將使率土皆寧居。一人縱欲萬夫病，  
不惟亡國兼亡軀。三郎初年亦英銳，講武風動驪山墟。  
姚崇力用破羣議，嘉猷善政不一書。台衡繼以宋廣平，  
貞心烈日秋霜俱。自從政柄歸偃月，鴉為鸞鳳麟為猪。  
幽陵乘隙弄王室，愛之如子矧肯誅。養成跋扈悔無濟，



六蜚失馭蒙塵趨忠王但可盡子職因危被袵徒嗟吁  
卓然天末幹神鼎盜手奪出驪龍珠唐家累世罹女禍  
一車纔覆又一車奈何目擊昧殷鑒乾陽甘為羣陰軀  
乃知君德貴剛健不爾何以令八區於戲後來其鑒諸  
於戲後來其鑒諸

石鼓詩

粵自鴻蒙剖元秘天祚有熊炎帝繼侯剛覃思神與凝  
摹寫三千入書契蒼姬一變史籀出鯨攬鰲吐鳳鸞振

嬴秦自帝不古師遂使姦斯愚叔世當時玉筋天下獨  
爾後爭奇古文棄末流諸子相祖述刊樸遺淳趁姿媚  
我嘗慨此愧疎淺一髮空危萬鈞係竭來庠宇覩石鼓  
玉立儼然三代器細思伊始將安庸或謂宣王章獵事  
且疑且信邈難詰日月羣陰欲食既或為雷電下取將  
僅餘二百七十二貞堅不墮劫火灰蒼古猶含太初氣  
世間鐘鼎瓦礫如隻辭千金未為貴昌黎作歌恨才薄  
坡老來觀惜時異區區流轉又幾朝終不能忘見天意若

令好事堪把玩攘竊恐應窮萬計平生漫有博物名  
視不能詳一字沈吟獨立西風前喬木荒煙日西墜

毛良卿送牡丹

并序

同開毛良卿家牡丹盛開意余一過而未敢  
顯言日者以折枝數花見貺余媿老嬾不能  
副其意故作是詩以釋之

三年野處雲水俱逢春未始襟顏舒故人持贈木芍藥  
慰我意重明珠入門神彩射人倒荒却爭看傾城姝

急呼瓶水浴紅翠明窻靜几相依於自言私第惟此本每  
開蹠轂窮朝晡樹高大許花數十紫雲滿院春扶疎栽  
培直訝天上種熏染不類人間株有時風蕩香四出舉  
國皆若蘭為裾貧家蔀屋僅數椽照耀無異華堂居天  
葩如此忍輕負轉首夢斷巫山孤明當灑掃遲覓烏未  
審肩踵荒寒無余聞感德良勤劬久習懶散倦世途深  
藏非是德公傲索居莫晒儀曹愚禁厨一齋味已得類  
推固可知其餘君持詩去為花誦蜂蝶應亦相懽娛

遊香山

山行彌日山益奇亂峰挾翠如吾隨遊人聯蟻度林杪  
細路一線雲間垂茫然四顧動心魄嵐光蕩秀浮雙眉  
路迴寶刹忽風墜大鵬九萬離天池林煙媚景翳復吐  
欲見不見神護持松藏雷雨太陰黑泉迸巖藪銀虹馳  
我來青帝已迴馭大古殘雪猶離離一聲曉鳩百花落  
兩崖紅雨春淋漓笑驅虎豹坐盤礴悠悠萬古歸支頤  
須臾興盡下寥廓長風入送雲邊詩蓬萊兜率杳何處

無乃造物移於斯往年夢裏記曾到先聲已為猿鶴知  
惜無奇語勒丹壁坐令清賞成絕癡斜陽忽將暝色至  
山靈應怪歸鞍遲人間勝事忌多取毋使樂極還生悲

贈劉仲憲

并序

仲憲衛州人以儒掾臺省者十餘年清苦如  
一日人饋遺皆不受能詩喜談政治嘗謂為  
天下不自農桑始三代之盛終不能致間嘗  
叩之其言激切或至淚下余器其人類古君

子故以詩贈之

廟堂鼎食窮水陸風紀惠文寒聳玉而君名位不省臺  
常見私憂結眉目竭來我過白所懷如枉未伸功未錄  
諄諄三代治安本修水火金并土木烝民既立教乃敷  
和氣春風生比屋自從秦鞅廢井田王政絲棼民濕束  
利歸兼并富嚙貧萬世禍基從此築漢興文帝殊有為  
瓦礫黃金金玉粟蠹農一切悉禁絕千耦如雲四郊綠  
下及魏晉隋唐若唐或耀武功或貨贖盡列民力供上需

何異養身還餌毒間時偶爾值小登悔禍元出天公獨  
勸農使者徒上功虛麗祗堪文案牘繹騷後迨五季間  
競投錢錁懸刀鋸民間十室九皆空父子幾何不溝瀆  
吾元有國天所資世祖躬歷艱難熟未遑禮樂刑政頒  
首闕司農惟穡督至今在在著作林枝幹排雲葉猶沃  
當時治效槩可知行不齋糧居露宿茲非前聖後聖規  
豈特千年萬年福統元欲復今何難政坐因仍弗加勗  
駿奔期會誇獨賢深竟根株銜能獄毀方求媚為通融



滌垢搜瘢稱幹局嗚呼是豈經遠圖刑剗誰虞覆公餗  
孟氏古稱王佐才照世格言星日煜論治畧無奇異聞  
唯說耕桑與鷄畜使當此日出此言可必諸公盡顰顙  
聖賢於彼非不知但恐違天拂民欲竊嘗窺管得一斑  
端本澄源在當軸仍擇師帥專撫綏且諭臬司精考覈  
的行黜陟表情勤重立賞罰旌慝淑如斯上下不裕寧  
伏鑽市朝甘顯戮我聞其語汗雨如始也解頤終項縮  
半生醉夢鄭衛音一旦醒心韶濩曲劉君劉君策固佳

俯仰悠悠知者孰傳存拾潘示永箴書著興戎昭往躅  
君不見東家求官交近侍西家豪富相徵逐奈何溫飽  
不自謀日為黎黔欲長哭我知君心如古人我知君才  
非世俗子牟身遠志在廷梁父調高音振谷賈生流涕  
叫虎闕屈叟甘心葬魚腹舊聞造物輔善良比歲看來  
亦翻覆紛紛已往姑莫論目擊試將吾友卜承家千里  
止一男半夜麒麟去何速淚巾又燥女又殤蘭玉埋香  
見無復士夫固以貧為常門戶那堪禍相屬我嘗送米

猶見却一芥他人有輕觸處勤節義愈凜然風雪倒山  
松栢矗邇來蹤跡尤可嗟十倍戒途與脫輻勞勞簿領  
頭斑白承務酬官在昏夙否極或者泰運還有詔吏止  
七品服君由弱冠冠儒冠一槩誰分鸞與鵬世間屯難  
表裏攻阮籍途窮未為促昨朝跋馬過所居圭萼荒涼  
雀堪撲坐無裯樽甌生塵庋有詩書盤首宿歸來歎羨  
原憲貧却顧輕肥還自惡蹇余亦本山野民仕路強趨  
終躋跼向非親命須官為定買烟霞事耕斲書生所見

然頗同欲奮不能寧韞櫝因知世事如意少詎止君家  
為不足子孫荀列多冥頑玉帛山堆足憂辱國忠貴顯  
奴隸憎黃憲清貧古今伏人生果在官有無可與智言  
難衆告今晨霽色雨洗新羣木疎明麗朝旭一杯陶寫  
千古情我起踏筵君擊筑天開羅幌雲千疊地展錦屏  
山四簇不須華俎飮薨纛政要露杯羞祀菊須臾酩酊  
彼此忘良玉滿庭風動竹

過長春宮

往年嘗夢蓬萊宮三山鰲背搖虛空滄溟俯視一衣帶  
銀河鼓浪來天風茲遊良不異疇昔半日惝恍迷西東  
平生頗似有仙分足跡未到神先通層樓複觀此誰構  
只疑天巧非人工繞簷松影黑於海步驚棲鶴翔雲中  
西山亦喜得佳客巍我相向如爭功遼金興廢渺何許  
今人一笑憐鷄蟲須臾遍歷至方丈壺酒盤果羅青紅  
心清已覺破煩暑左右况復扇兩童道人見我樂幽勝  
故為留戀談無窮鼎鑪百沸失膏火風水萬里忘萍蓬

默求詩句為相答半醉揮出毫端虹煙雲滿室動鬼神  
不但為彼開盲聾笑謔人境兩相稱此會詎與尋常同  
却愁歸去到塵世又隨俗迹墮樊籠

西巖醉筆

興來放步白雲嶺海濶天高異人境亂山萬馬東南馳  
只恐郊原碎俄頃乾坤誰管白鳥閑今古空餘野烟冷  
何當結屋最上頭擺脫塵紛事幽屏

歸田類稿卷十七

欽定四庫全書

歸田類稿卷十八

元 張養浩 撰

五言律詩

公退書四知堂壁

邑壯憐才弱官微慮患深  
韋弦千古意冰蘖一生心  
袖有歸來賦囊無暮夜金  
二年何所得惟悴雪盈簪

上都道中二首



窮近惟沙漠昔聞今信然行人鬢有雪野店竈無煙白  
草牛羊地黃雲鵬鶚天故鄉何處是愁絕晚風前

幽都風土異六月亦冰霜草地寬於海土山低似牆如  
毛民簡古鬻雪客荒涼自媿成何事孑然天一方

御河舟中

水路苦多阻扁舟之字行去雲由雨點來浪自風聲顛  
倒驚人影經過問地名胡床施樓底未覺負鷗盟

久雨初霽書所寓壁

凝雨歇簷滴  
頽雲開日華  
穴垣驚暗笋  
搶地惜幽花  
市隱靜於野  
客居閒侶家  
故園亦皆寓  
心定自無譁

自堂邑移政博平權縣事

吾邑堪藏拙  
胡為又此臨  
四知民過譽  
三語吏驚心  
越俎慚非據  
操刀媿不任  
幽懷誰與語  
風竹有清音

送宋故文丞相孫章甫上西省都事

之子名臣裔  
何堪簿領拘  
盤根知利器  
滄海見遺珠  
河出崑崙遠  
山餘碣石孤  
翠紅蓮幙底  
佳句未應無

送姚學士

游目當今士獨公文柄操江空孤月白天濶片雲高班  
馬知誰配王楊笑爾勞盛名千載後江漢日滔滔

雨後行縣

命駕行農事江天欣晚晴泥塗遲馬足風樹遠鶯聲川  
迴水雲活花濃田野明長官非酷吏耆老不須驚

廉園秋日即事

雲物經秋慘陂塘過雨渾身閒  
顓簡策意得畧琴尊強

恬蟬多事輕離燕  
寡恩吾詩雖數語  
喜欲筆諸門

廉園會飲

倥偬常終歲  
從容偶此閒  
霧松遮老醜  
雪石護蒼頑  
池小能容月  
牆低不礙山  
殷勤問沙鳥  
肯與廁其間

晨興用俞立之韻

寒碧洲痕淺  
深青地勢平  
岳姿呈雅淡  
樹影碎空明  
窻納一天曉  
人懷千古榮  
移牀高處坐  
遙看日東生

冬夜早起

推枕人初起出門星尚存歲寒郊野闊天早樹林昏  
窻影猶殘月鷄聲已遠邨孜孜何所事時取故書溫

我愛雲莊好九首

我愛雲莊好夕煙樹半腰亭高無近矚歲樂有新謠  
農冀初開地童梁已壞橋眼前皆事業何必立人朝

我愛雲莊好幽深稱隱居許生好山水陶令樂琴書  
槲柿風霜後松筠雨露餘徜徉今數載心賞一如初

我愛雲莊好溪流轉玉虹驚飈荷背白殘照鳥身紅  
遠

意微茫外真惟放浪中終身能若此甘作灌園翁

我愛雲莊好依稀孝敬村隣誇蚕就簇奴叱犬當門流  
水幽棲谷深衣獨樂園只今誰得此高興欲雲騫

我愛雲莊好柴門俗客稀行田蟲撲帽坐樹蟻緣衣雲  
水一銅鏡霜林萬錦機東岡陂故在辭聘未全非

我愛雲莊好絕無聲利塵林篁清耳目編簡肅心神种

放非樵客

見宋名臣  
言行錄

焦先豈野人

見三國志  
管寧傳

此心幸無

屈烏用更求神

我愛雲莊好衡門晝寂然苔香花覆砌石潤竹通泉獨處蓬為室閒遊杖挂錢白頭鄉社裏未覺媿前賢

我愛雲莊好光風四季兼泉聲聞隔屋花影見垂簾丘壑間如傲門庭靜侶嚴箇中何限福動止不須占

我愛雲莊好民風太古淳婦勤絲滿甕兒嬾硯凝塵秦系唐高士張融齊逸人只因疎散久每每忘冠巾

自訟

忽忽又終日悠悠仍此生道心知有負學術媿無成丘

壑徒留意文章浪得名從今都憂去密體聖賢情

惜鶴十首

并序

鶴仙禽也由凡翼非其比恒不為世人所愛而愛之者往往皆山林中人蓋物以氣合理勢然也予嘗得其尤者一豸之既久翩躚與人相習日者為田姬傷其脛九病兩月斃惜哉因取其始末作十詩將以慰其不幸云爾

購鶴



野處幽獨甚千金得令威挾雲出塵網領月到柴扉  
足防颺去遮庭使學飛自今湖上路樹石亦光輝

友鶴

雲雨手翻覆紛紛知己誰玄裳真莫逆皓首誓相期  
把酒或前舞游山時後隨會當作人語細與話瑤池

病鶴

渠本仙家種胡為久不安强行時塌翼竚立恐遺丹  
誰藥相如渴獨憐范叔寒一鳴雖确确猶自徹雲端

鷺鶴

饋藥人空數乘軒氣漸低無心吞餌餌何處覓刀圭暴  
日資丹火杯泉洗羽泥漫令通臂友時復過幽棲

挽鶴

共處人煙外誰期禍乃身九臯空有恨四野欲無春華  
表雲應淚瑤臺月亦塵當年林處士泉下定相親

招鶴

歌徹楚人些冥冥恨益增楓林空落月甲帳只寒鐙仰

問天無語升呼谷謾應料隨風露氣飛入亂山層

塵鶴

非為恩帷蓋從遊歲月深忍令一杯土埋盡九臯心致  
莫據情素為銘表德音小松栽尺許悠久庶能尋

憶鶴

玉立昂藏態山中我與君幾年遊賞共一夕死生分徐  
步閒窺沼高飛遠帶雲為誰重起舞倚杖立斜曛

夢鶴

岫幌銓昏處依稀見瘦軀引吭如有訴側頂不容呼枕  
上行雲繞松梢落月孤堪憐漆園叟漫為蝶區區

圖鶴

百計無從見明窻吮筆圖研朱染霞頂屑玉抹雲襦野  
狀雖非侶山居亦勝無卻愁風露夜拔宅上天衢

飲城南劉左丞別墅

繚白汾山路含暉近水亭青林雙窳堵紅樹萬娉婷投  
轄從陳醉沈湘笑屈醒黃昏休繼濁海月上青冥

山行二首

行徐忘路遠偶爾到山村斷嶺雲通氣顛崖樹倒根望  
深增暝色坐久愴吟魂歲莫求田意悠悠孰與論

一嬾將成性春遊尚爾勤花歌知雨力水皺見風文碧  
落一明月青山半白雲卻愁從此去塵冗又紛紛

憫農

父子傳衣出夫妻趨熟分未言先欲泣乍見內如焚微  
負敲門急充饑飲水勤何當天雨粟四海共懽忻

鑿池

野性喜觀水，開池臨小亭。  
雲天雙玉鏡，波日萬金星。  
魚鳥新歡遂，江湖舊夢醒。  
風行文自換，三復聖人經。

晚霽

老懶便幽靜，空亭步翠行。  
牽牛上籬落，鬬雀下簷楹。  
斜照慳窻影，停雲足野情。  
田園無限樂，夫豈為逃名。

村居春晚

門掩煙霞影，閒身自覺榮。  
年符天地數，心逐水雲盟。  
短

褐無時事深林有暮鶯清風生几硯老子又詩成

晨起三首

夜永起常早微吟步繞籬形癯山亦病腰偃樹尤奇  
斜月斜明屋稀星冷浸池憂然田器響隣叟出茅茨

叩戶人求火踰牆犬吠林天疑山外盡雲覺水邊深  
耿耿憐身世茫茫慨古今東阡與西陌誰識莫年心

戀枕嫌多夢開簾曙色迷鶴寒依戶立猿餒近廚啼  
石泉鳴屋吞烟樹隱隄村居真可喜觸處是詩題

池上

地僻有餘勝扶筇步繞池鶴欣常自舞魚定恍如癡  
野日融春意籬烟動午炊笑呼華與鵲聽我綽然詩

半仙亭獨坐

世路謝奔走雲山隨起居雨晴花窈窕風夕水紆餘  
膠漆漁樵我筌蹄筆硯書浮生星火底真悟者誰與

乙丑山中拜詔

門外傳呼詔堂前散盡雲恩榮被林木惶懼到鷗羣才



拙疎經濟學荒寡見聞五年凡五聘深愧報無勲

磐石

晚晴盤石上秋興與無垠止水可觀性好山堪醉人翠  
金明野景幽獨遠囂塵野鶴忽飛起詩成應又新

客中寒食

鶯燕與春競綺羅乘夜遊東君何似儻北客獨淹留蘊  
藻先塋夢萍蓬故國愁冥冥心語口何日大刀頭

觀菊

始旦起觀菊滿籬金翠明色嚴霜亦懼香盛世皆清凜  
有英雄氣泊無兒女情柴桑與吾土元自不多爭

半仙亭秋暮


野處宜秋景霜林遠更紅虎溪無俗駕鶴氅有仙風  
槁葉鏗然下新題偶爾工閒來檢身世頗覺昔人同

遂閒堂獨坐

疎拙閒宜處豪華老自降瓶梅疎浸玉庭檜密聯幢  
猫踞硯池水鶴眠書舍窻村居吾所喜非擬鹿門龐

早起

謝政身無責家人怪宿興東枯吹鼎火鑿凍汲池冰鴉  
宿聲俱寂鶴寒影欲凝湛然平旦氣自覺興多增



歸田類稿卷十八

# 欽定四庫全書

集部

歸田類稿卷

十九至  
二十二

詳校官中書臣孫溶

主事臣呂雲棟覆勘

總校官編修臣王燕緒

校對官中書臣陸湘

謄錄監生臣姜有望

欽定四庫全書

歸田類稿卷十九

元 張養浩 撰

七言律詩一

過舜祠

時年十七

太古淳風叫不還  
荒祠每過為愁顏  
蒼生有感歌謠外  
黃屋無心揖讓間  
一井尚存當日水  
九疑空憶舊時山  
能令子孝師千古  
替叟元來不是頑

登泰山

風雲一舉到天關快意平生有此觀萬古齊州烟九點  
五更滄海日三竿向來井處方知隘今後巢居亦覺寬  
笑拍洪崖詠新作滿空笙鶴下高寒

和田師孟春夕韻

翠蟬紅濡雨霽初一軒深靚稱幽居艷雲流月天機妙  
華表撐秋鶴影孤勘破宦途盤谷序蹴開天網漆園書  
何時舊隱相携去君種山田我水漁

驛途小憩書田家壁

疎林浙漚露藩籬雞犬花陰白日遲  
杯飲汙尊存太古  
標枝野鹿見今茲  
荒城路轉山孤聳  
古廟牆推樹半欹  
我本三生田舍叟  
買牛賣劍定何時

直省

是非榮辱日相尋  
壯歲何堪白髮侵  
三釜若非親有命  
片帆應與世無心  
天公所靳惟清福  
交友難逢是賞音  
何日超然遂初志  
溪山佳處恣登臨

初拜堂邑縣尹

一縣安危任不輕  
初聞恩命喜愁并  
徒勞人爾豈吾意  
何以報之惟此誠  
操刃豈容傷美錦  
循牆誰敢望高名  
前賢為尹規模在  
他日須期與抗衡

堂邑遠心亭飲歸

小雨林梢生莫寒  
野亭朋酒暫盤桓  
弄蒼始見春風巧  
作牧方知政事難  
吉網羅鉗非我志  
堯年舜日儘民懽  
他時考績甘書下  
自有知音後世看



登憫忠閣

一閣渾疑鬼構成倚欄天外壯心驚  
河山都向掌中見雲霧忽從胸次生  
死戰一時皆朽骨憫忠千古定虛名  
只今兵裹輦比了留與殘僧樂盛平

飲平則門外崔氏別墅

十年夢斷鑑湖春彷彿中郎類虎賁  
珮解瓊瑰愁漢女機閒雲錦失天孫  
日光亂軋波光碎野色遙連樹色昏  
愛殺主人清且古相邀石上共窪樽

元日朝賀

綿蕝區區笑叔孫  
聖元相萬漢君臣  
鳳龍齊舞雲間樂  
虎象爭輸海外珍  
仙仗分開丹禁曉  
朝班浮動翠花春  
與天同大惟王者  
今日方知此語真

挽劉夢吉先生

白髮山林僅四旬  
兩朝不肯屈經綸  
才名暗折世間壽  
氣節偉高天下人  
康節縱吟無限樂  
希夷高卧有餘春  
一生懷抱誰能識  
他日休猜作逸民

過中都

三月龍沙春未知  
雲山環野玉參差  
半空蜃氣雲間闕  
一路驪珠馬上詩  
豐沛漢皇湯沐邑  
幽岐周室治平基  
我來歷覽開天處  
億萬斯年理固宜

題康信夫宅湖石

翠竇寒生太古苔  
乾坤元氣此胚胎  
一峰雷震崑崙裂  
七竅神剗混沌開  
呼丈便宜牀下拜  
和雲誰負座間來  
不須更作山林計  
已覺高情隘九垓

送范德機赴海北道憲司知事

金薤銀鈎兩絕奇，才華江右捨君誰。  
一官毛義榮親日，千里呂安懷友時。  
叫斷霜天鴻雁瘦，吟殘山月鳳鸞飢。  
從今夜，江湖夢說，侶楊花未必知。

早春郊外

去歲春光蝶夢空，今年邂逅又東風。  
岸水欲泮猶裹甲，汀草將抽尚鞠躬。  
一氣未嘗停晝夜，百花何處認青紅。  
新詩亦在氤氲裏，說與當年太極翁。

春日水邊

袖拂烟霞坐釣磯  
登臨終日澹忘歸  
鶴嫌客俗穿雲去  
燕喜春陰掠地飛  
樓外長江流世事  
雨邊殘照照媚林  
一閒久與時情遠  
尚賴東風不我違

城樓晚眺

禹跡茫茫畫九州  
斜陽古意滿林邱  
嘯呼風月來詩卷  
醉挽山河入酒甌  
華髮半簪天與老  
丹楓兩岸水分秋  
逢人莫話功名事  
且道甘心落魄休

秋夜枕上

繞屋江聲風夜呼一鐙搖影客牕虛俗緣去盡尚懷土  
習氣未除猶嗜書今古等為浮世夢林泉空憶故山居  
何時真遂平生志野鶴孤雲縱所如

寄歷下諸君

張飲東秦記昔年衣冠傾倒漢文園禮忘賓主觥籌亂  
聲攪弦歌笑語喧世路勞形真左計人生行樂是名言  
舊遊回首何時復腸斷春風灤水源

過東方朔廟

先生高識絕當時誰道偷桃舊小兒  
揖讓不逢三代盛滑稽聊免一身危  
草荒漢構雲承宇苔蝕顏書雨澌碑  
我亦從來惡苛禮斜陽遙望酹空卮

題廉野雲城南別墅

鍾鼎山林果孰優羨公騎鶴上揚州  
田園獨占人間勝懷抱尚餘天下憂

公之父有堂名德樂

好為習池留故事未應綠

野美前修半生乾沒塵埃底羞向滄浪照白頭

承宣堂早衙

桴鼓無聲獄市清  
南風吹綠滿槐廳  
要囚服念五六日  
華髮又添三四莖  
胥吏抱書趨雁鶩  
牙兵持挺趾階庭  
職微尚恐才難稱  
敢效龐公醉不醒

齋居春莫

漂泊東君底處家  
落紅風捲赤城霞  
半牕春夢子規月  
滿院客愁楊柳花  
世事悠悠惟欠酒  
棠陰密密欲藏鴉  
韶光九十須臾頃  
不是劉郎髮易華



中都雷家站枕上

紅塵瀕洞路間關又見東風馬首還報國丹心炳星日  
壓頭白髮重丘山休疑奉檄毛生喜莫羨歸田靖節閒  
說與春知亦絕倒論人不在去留間

送趙道士出祠南岳

閬苑仙人雲錦裳天風絳節恣徜徉紫簫吹月山雞舞  
寶劍飛空海若藏靈隱依然存故我勝游聊爾歷遐荒  
三生我亦烟霞客追逐無從鬢欲霜

雪後過張秋泉盆花盛開索詩為賦

道人冥坐養黃芽百順熏烝到物華風暗玉塵門外雪  
春明銀燭坐間花潛移造化韓湘子高蹈塵埃蔡少霞  
却笑三郎無伎倆謾令羯鼓不停撾

郊原清曉

清曉郊原望翠微  
隱如波浪與雲齊  
老夫粟里懷方切  
浮世槐安夢政迷  
白雪糝平鵝  
鸛浦黃雲翻動稻梁畦  
昨宵怪有維魚兆  
釣艇相銜水滿溪

京師除夕

旅食京華歲又殘，悠悠身世去留難。  
身能安分賢於隱，子肯讀書貴侶官。  
潦倒乾坤雙鬢禿，淒涼今古一燈寒。  
明朝五十從頭數，且盡椒盤此夜懽。

李溉之還山隱居

厭直承明拂袖東，此懷未易語諸公。  
高情野鶴雲霄外，往事醯雞瓮盎中。  
八表謫仙鯨海月，一襟高士虎溪風。  
黑頭莫訝歸來早，政要山林伴退翁。

過沛縣高祖廟

天厭秦苛欲世蘇赤龍從此入西都五年諸國破迎刃  
四海一朝安覆盂山峙尚疑神劍在雲飛猶與大風俱  
不知萬歲千秋後魂魄端能到此無

登徐州項王戲馬臺

咄彼重瞳太計疎欲憑扛鼎帝堪與鴻門老叟無奇策  
烏岸漁人有遠圖佇目河山空錦繡傷心劉項總丘墟  
經過莫笑書生懦我亦毫端敵萬夫

過錢塘

天上鈞天杳莫攀繁華移在武林間樓臺萬井蔽虧日  
烟水四圍搖撼山花草故宮春一夢江湖遊子鬢雙斑  
此心只恐移聲色舟促篙師半夜還

游西湖

一片樓臺四面山玻瓈搖碎錦欄斑畫船載酒來天上  
寶月和雲落世間千古風烟留客醉幾時魚鳥伴余閒  
乃知西子真尤物竟日令人不欲還

游靈隱寺

常憐無地蛻塵烟人向空門見性天一路密松山左右  
半空飛瀑寺旁前馴猿就手取新果老衲鞠躬參舊禪  
歸去不妨鐙火晚與君同看萬家蓮

興化道中

駭目樟榕樹半天雄陰翠壓道途邊滿城香火民風鬼  
到處樓臺海市仙驛舍遠因山曲折僧居喧為水潺湲  
有時點檢奚奴錦盡覺新詩帶瘴烟

福州

聞說東南秀所鍾此行處處覺詩工飛來天上三山島  
驚倒人間百歲翁荔子種成唐室禍蘆花飄滿越王宮  
斜陽無限興亡恨何事烟波尚爾東

過髮冠仙姑隱所

抗塵自覺道無緣何幸容參杖屨前春色九天歸絳節  
喬雲一朶冠華顛馳神夜宴西王母御氣時尋姑射仙  
四海異人今日見此行萬里不徒然

貢院試筆

斯道寥寥百許年天開文運到吾元鑑衡別物寧容意  
桃李成蹊不待言下筆園林驚落葉得人麟鳳瑞中原  
潛心為向朱衣道莫使劉蕡李豸冤

詔五十以上未第者賜出身有差

吾皇仁聖邁勲華重為斯文掩類瑕漢苑有林皆桂樹  
禹門無浪不桃花殊恩遠紹千餘載和氣旁延百萬家  
比屋可封今起本懽餘不覺淚橫斜



直省 時為左司都事

翠蔭長廊樹影深  
塵喧收盡鳥遺音  
古今吾道窮途恨  
日夜家山故國心  
花簇鳳池春欲合  
雲連仙島晝常陰  
書生習氣真堪笑  
簿領如山尚苦吟

辭叅議還家

平昔微官本為親  
歸來一意奉常珍  
都將丹漏門前曉  
辨作斑衣膝下春  
忠孝誰云難遂意  
始終今喜得全身  
呼兒為我修園圃  
從此無心走世塵

挽元復初

韓孟雲龍上下從  
豈期神物去無蹤  
知君本自雄才力  
顧我安能直箭鋒  
一死一生空世隔  
三薰三沐為誰容  
平生碑版天留在  
不朽何須藉景鍾

遊華不注

蒼烟萬頃插孤岑  
未許君山冠古今  
翠刃剗雲天倚劍  
白頭歸第日揮金  
攀援直欲窮危頂  
歌舞休教阻盛心  
星月滿湖歸路晚  
不妨吟棹碎清陰

同鄉友宴會波樓

久處紅塵眼倦開飄然今喜到蓬萊  
春風碧水雙鷗沒落日青山萬馬來  
柳外行舟喧鼓吹途中過客指樓臺  
一時人境俱相稱却恐新詩未易裁

遊香山

常恐塵紛汨寸心好山時復一登臨  
長風將月出滄海老柏與雲藏太陰  
寶刹千間窮土木殘碑一片失遼金  
丹崖不用題名姓俯仰人間又古今

同元復初飲許仲文別墅

曉日樓臺海市仙  
春風歌吹酒家天  
五雲分彩來瓊島  
兩鶴聯飛下玉田  
流水故將塵隔斷  
好花都被雨開全  
人生佳處無何國  
鍾鼎山林恐未然

過顏魯公廟

李唐失紀相非夫  
竟遣忠良與禍俱  
抗賊一身皆是膽  
留名千古不因書  
極知老境桑榆近  
爭忍清時社稷孤  
下馬荒祠訪遺蹟  
北風吹樹渺愁余

上都察院

柏臺人散坐堆氍毹  
默記灤江四往迴  
髮為鷹冠容易雪  
心因蝸角等閒灰  
慚無元素迴天策  
空負坡仙酹月杯  
兩處飄零家萬里  
亂山遮斷白雲堆

秋日梨花

雪香吹盡樹頭春  
誰遣西風為返魂  
月影已非前日夢  
雨容獨帶舊時痕  
只知秋色千林老  
爭信陽和一脉存  
莫訝殷韓太多事  
仙家原不計寒暄

九日

一行作吏廢懽遊  
九日登臨擬盡酬  
詩有少陵難著語  
菊無元亮不成秋  
雲山自笑頭將鶴  
人海誰知我亦鷗  
幸遇佳辰莫辭醉  
浮雲今古劇悠悠

大雨

不用風雪雷  
霆江海等字

六合乾坤一太陰  
仰觀毛髮為蕭森  
排空疑有鬼爭戰  
對面不聞人語音  
元氣只愁今日竭  
桑田更比向來深  
須臾林杪標新霽  
一抹斜陽濕欲沉

寒食遊廉園

湖天過雨澹春容  
輦路迢迢失軟紅  
花柳巧為鶯燕地  
管絃遙遞綺羅風  
羣仙出沒空明裏  
千古銷沈感慨中  
免俗未能君莫笑  
賞心吾亦與人同

留別元復初

臺閣聯飛二十年  
臨歧欲別重悽然  
人言廉蔭才相軋  
誰信陳雷志愈堅  
古井不妨風浩蕩  
浮雲何損月嬋娟  
江湖秋淨多來雁  
莫惜平安到瘴烟

中都道中

細草和烟展翠茵，雜花勻簇道傍春。  
鳴禽曠野棲無樹，破屋荒山住有人。  
露濕弊袍寒襯月，風餐行鉢暗凝塵。  
去年閩海今沙漠，贏得霜華鏡裏新。

客中除夕

野性毵毵不耐官，強顏塵土步邯鄲。  
移文久為雲山笑，捧檄聊供菽水歡。  
香返梅魂春一脉，愁叢燈影夜千端。  
古人事業余何有，羞見茅齋歲又闌。



直省

微風吹雨濕層陰寂寂長廊靜足音怒虎九關天日遠  
冥鴻一線海雲深求田素有陳登志作吏初非叔夜心  
說與飢鶩休嚇我掉頭巢父正長吟

留別鄉里諸友

粉署銜香十許年故鄉重到重留連子年戀闕心空赤  
江總還家鬢尚玄金縷歌殘華鵲月蘭舟搖碎灤湖烟  
一襟離恨東州路莫訝羸驂不肯前

興和道中

底事勞勞形與神  
道途鞍馬動經旬  
煙橫絕澗疑無地  
風響深林似有人  
早發舉鞭揮霧露  
夜行翹首認星辰  
何時却逐桑榆晚  
愛殺坡仙此語真

建寧道中

行盡溪山得市廛  
橋樓深入路綿延  
商帆腥帶諸蕃雨  
天宇昏連百粵煙  
言語不通剛作字  
道途良苦且停鞭  
老兵來報肩輿穩  
使我愀然愧昔賢

不敢以人代  
畜丰山事

泉州

萬里飄零兩鬢華  
瘴煙為屋海為家  
山無高下皆行水  
樹不秋冬盡放花  
得句珠還合浦月  
亂懷杯吸赤城霞  
蓬萊咫尺無由到  
慙愧當年犯斗槎

寄李道復平章

文武全才每許君  
逢時談笑建奇勲  
世稱李道為賢相  
帝重嚴陵是故人  
滄海兩扶新日月  
青天一掃舊煙雲  
盛名自古多難處  
好及明時乞此身

黃州道中

濯足常思萬里流  
幾年塵迹意悠悠  
閒雲一片不成雨  
黃葉滿城都是秋  
落日斷鴻天外路  
西風長笛水邊樓  
夢迴已悟人間世  
猶向邯鄲話舊遊

歸田類稿卷十九

欽定四庫全書

歸田類稿卷二十

元 張養浩 撰

七言律詩二

登歷下亭

僮年嘗記此遊遨邂逅重來感二毛  
翠繞軒牕山陸續  
玉繫城郭水周遭  
風煙誰道江南好  
人物都傳海右高  
怪底登臨詩興淺  
鵲華曾見謫仙豪

飲城東劉氏園亭

昨日餘醒尚未醒  
玉溪絲竹又尋盟  
爛遊償我從前債  
沈醉由他已後名  
雨點殘紅花意動  
風敲疎翠竹陰清  
閒來吟嘯無虛日  
未覺歸田負此生

哭張澹庵平章

平生許國膽  
困輪諤諤危言不顧身  
人道龍逢非俊物  
我知汲黯是忠臣  
轅駒仗馬寧無媿  
縛虎擒蛟似有神  
故劍年來漸零落  
訃聞不覺淚沾巾

翠陰亭獨坐寄莫俊德經歷

抗俗支塵力不任  
故園歸卧遂初心  
近山障霧還疑遠  
淺水涵天却訝深  
有幸鷗盟君與我  
無情鶴髮古猶今  
年來酷愛香山老  
都把悠悠付醉吟

秋夜露坐觀月

亂雲風靡散縱橫  
老子胡床對月明  
六合透光天一鏡  
萬家生白夜三更  
露從丹桂香邊滴  
詩到瑤臺影裏成  
安得騎鯨上寥廓  
細將摩撫看虧盈

酌突泉

繞欄驚視重徘徊流水緣何自作堆三尺不消平地雪  
四時常吼半空雷深通滄海愁波盡怒撼秋風恐岸摧  
每過塵懷為瀟洒斜陽欲沒未能回

秋郊晚眺二首

六鑿相攘久失平歸來方覺此心清湖山日與軒牕對  
猿鶴時隨杖屨行隴上黃雲秋有望鏡中白雪晚無成  
衰翁本自疎經濟誤得徵君一世名



恐富求歸王晉平千年心迹喜雙清天低似隔地形斷  
山暗欲隨雲氣行塵外景因人更勝閒中懶與慢相成  
韓康只道潛身了已被時人識姓名

宋王秀之為晉平太守期年求還人

問其故曰此郡沃壤珍阜日至人所昧者財財生則禍  
逐智者不昧財亦不禍遂吾山資已足豈宜久留以妨  
賢路見本傳

寄省叅議王繼學諸友自和十首

曩昔塵奔為悅親而今雲卧復天真山林充隱當容我  
館閣求賢豈乏人噩夢久隨風散曙衰容難與物爭春

綽然煙景無窮在莫怪沙鷗不易馴

身與功名果孰親萬鍾何似一瓢真若教宇宙無難事  
未必山林有退人遺語五千方外教行窩十二洛中春  
老懷久矣忘機巧猿鶴欣欣燕雀馴

木密垂枝手可親  
娒隅羅勒味尤真  
詩情滄海騎鯨客  
世故青樓擲鼠人  
列子庭樹有陰僧結夏  
野花無語女懷

春清風一榻茅簷底  
六賊三尸犬許馴

鹿豕同遊木石親  
家山歸卧偽邪真  
情知五袞縣輿客

肯作千金鬻帚人往事回頭皆噩夢故園投足總陽春  
麒麟掣斷黃金鎖為問羣仙孰可馴

筆硯琴書素所親利名常恐汨吾真客頻惟以病辭酒  
景勝却愁詩迫人斷岸樹連衣帶水好山天展畫圖春

卜隣自得孫期氏獷俗年來喜漸馴

後漢孫期德化  
一方見本傳

厥初吾與物俱親漸喜年來喻道真心至草間石作虎  
魂離山上樹疑人息機反照三絨口變燧回星幾過春  
從到綽然亭子上韓家五鬼亦俱馴

好爵於余豈不親思之爛熟見之真惟知徇貨攫金客  
不可越鄉懷璧人莊叟濠梁魚自樂濂溪精舍草仍春  
一琴一榻書千卷明哲他年庶致馴

密邇雲山欲我親高情未覺減元真不求天下號奇士  
但願里中稱善人無事舉杯澆遠古對花和露折香春  
一生志義伸無屈羨殺當年漢召馴

笠簪襤褸日相親彷彿躬耕鄭子真晚節中途九十里  
野航古渡兩三人愛圖山水王摩詰嬾謁公侯并大春

見後漢  
井丹傳  
豪氣平生六軍  
歟消磨今似女郎  
馴

諸貴葭莩後有親  
卅年孤苦幸全真  
膠航朽纜安能海  
漆几匡牀極可人  
黃妳肉忘三月味  
華香鏡納八荒春  
刀圭自入談天口  
百怪千魔一向馴

山中拜除自和十首

深山傳詔自天來  
萬壑雲隨喜氣開  
仰報賜環元有志  
俯思奪錦奈無才  
雁鴻聲斷冥霄漢  
麋鹿魂驚翳草萊  
君聖臣賢太平日  
不妨重占釣魚臺

角中憶昨故鄉來黃菊西風見六開道在去留從物議  
俗殊通介豈吾才飛昇未信海無藥陶寫且歌山有萊  
衰老於何息形影梅邊亭榭竹邊臺

牕下孔賓歸去來春隨三十六宮開虛言徒使燕人淚

列寔用休爭楚國才

左氏

世外此心無芥蒂海中何物是

蓬萊漫郎耳順宜知止誰敢重塵視草臺

文季休歌子夜來淵明自拆笈醅開舉觴月與春挑戰  
得句人驚天假才尚友誰能追北海尋真吾欲候東萊

見漢武求仙事何時晤對安心竟拂落菱花不用臺

快喚青州從事來浮生能幾笑顏開吹殘池錦風無狀  
洗出山屏雨有才久別故人驚夢薤倦游老子逐煙萊  
少陵鬢影今如許誰更狂歌上吹臺

禍福循環互相來幾人蹴踏鬼門開劉伶度世醉還醉  
莊叟處身才不才甘雨安能限苗稼春風未信略蒿萊  
冥思亘古真堪笑賢否均歸一化臺

見唐姚勗傳

雲送沙頭屬玉來風吹亭下水芝開須知問舍求田叟

那有經天緯地才我喜捲金巢飲樹誰期食菜國封萊  
若將吟醉論功賞老子宜專郭隗臺

捲簾風與月俱來滿地瓊瑤掃不開赤壁磯頭皆酒興

輞川圖上畫詩才天教疎散全山木誰識英豪死野萊

見唐魏元忠  
薦王義方事

一笑煙雲生脚底只疑身到紫微臺

北岳  
恒山

一名紫微臺見

李思聰淵集

庭空有鳥去還來天遠碧雲合又開玉井睡仙今古夢  
錦囊詞客鬼神才琴書有味隨鳥几徑路無媒滿翠萊



跌坐遂閒香一炷何人走馬過章臺

別墅有堂曰遂閒

不速三人自遠來雲莊莊上正花開獨憐山似營丘畫

共訝河如孝伯才

才如河注見魏崔光傳

愛惜鴛鴦休打鴨扶持

黍稷必芟萊高眠何敢輕軒冕直恐時人謗辱臺

見唐李景

讓傳

### 雲莊遣興自和十首

投閒自笑未能閒猶有微營方寸間亂撥浮萍嫌蓋水  
稀栽垂柳恐遮山萬金難買田園福一醉從教鬢髮斑

脫帽解衣磐石上和雲坐看鳥飛還

伊誰知我此時閒笑領白雲入坐間  
競國門前何少我  
元龍樓上儘多山  
向來矛戟蝸雙角  
此去琴書豹一斑  
可是綽然風景好  
斜陽吟落不知還

飛黃幸爾出天閒  
自在忘機草野間  
田種有時渾藉水  
村居無處不宜山  
半簷殘照餘金彩  
一徑雜花亂錦斑  
三十餘年星火底  
豈惟倦鳥解知還

中年才過即歸閒  
好在河汾屋數間  
病裏檢書多為藥

老來忘世不因山翠翻平野禾抽穎錦委深林荀脫斑  
莫恨韶光太相促若非衰莫詎能還

非是幽人酷愛閒無窮佳思水雲間兒要去鶴斜趨徑  
童覓亡羊直越山坐喜簷牙搖竹影行嫌屐齒破苔斑  
杜陵棗熟從人打快喚王陽去婦還

雞犬衡門竟日閒扶書移榻坐花間淡無情緒烟中柳  
暴有精神雨後山便可躡雲尋李愿莫教看日後劉斑  
見宋劉湛  
事文帝事忘機卻是長生訣何必滄溟訪大還

歸來心迹兩俱閒  
日日春生几桼間  
有土不多惟種秫  
無人可語只觀山  
隔山竹韻風敲玉  
匣砌苔痕雨漬斑  
說與王生莫相誚  
從今老犬不家還

見宋王僧達識  
何尚之復起事

故園輪指六年閒  
盡慰身心筆硯間  
人世虛如盧客夢  
野雲竒似郭熙山  
義經自契先天妙  
殷鼎猶存太古斑  
圖史滿前琴掛壁  
恍疑太素為余還

半世求閒始得閒  
醺雞飛去瓮中間  
盆池游戲均滄海  
塊石達觀即太山  
對酒便當烹郭索  
傷人且莫語黃斑

虎也見  
隋書

風煙滿目歸來好物我從今付八還

人云五十未宜閒我道彭錢亦夢間五斗折腰慚作縣  
一生開口愛談山荒村未莫門先掩老樹才秋葉已斑  
只恐溪翁厭喧聒隔林遙喚野猿還

綽然亭落成自和十首

莫疑五十便懸車要讀從前未讀書野鶴孤雲天曠蕩  
嶺猿明月樹蕭疎南柯國裏春無幾西塞山邊景有餘  
半世紅塵今得此不妨造物巧乘除

地僻門無長者車身閒不遺子公書羣山俯坐人堪醉  
萬事忘懷世自疎碧玉灑池新雨後綠雲滿徑落花餘  
憑誰喚起濂溪老聽說牕前草不除

款段閑身下澤車少游此語可紳書園花撥亂嫌春冗  
牕竹芟煩愛月疎只把酒償前日欠未應詩出古人餘  
東阡南陌時來往平昔私憂已盡除

淺學金銀不識車况能憑几口占書

見漢陳遵傳

一枝守分

固才拙三事力辭非計疏

於陵仲子不就三公為人灌園

稚子養雞為

鶴伴田翁飼犢與蠶餘從今蓮社從教醉百歲浮生大半除

鳩藤鳧鵲代安車踏碎沙頭鳥迹書漁父放舟迷遠近  
達人觀竹略親疎水文即是風蹤迹雲影無非雨緒餘  
莫笑太玄終寂寞平章花月幾新除

張弧休驚鬼一車吞爻今悟夢中書清閒豈敢班九老  
燕樂未應慚二疏禪榻鬢絲衰莫際賓筵麈尾笑談餘  
人間晦朔無心問誰更新詩體建除

門外紅塵幾覆車，閒愁原不到琴書。  
天何負物物天負，我不疎山山我疎。  
歲月推移身有限，乾坤呈露景無餘。  
只因田里堪容拙，豪氣而今尚未除。

緩步休乘八陣車

晉馬隆依八陣圖作偏箱車見本傳

高眠不草萬言書

但教眼底青山在，誰問頭邊白髮疎。  
悟道未能曾一唯

積功且盡董三餘

魏董遇勸學者以三餘讀書

古人倘使今留在甘

向門牆事掃除

山林六枉使星車，慚愧功無一可書。  
空使時人許高尚



那知學術本空疎任真更在嵇康右  
屈志誰餐穆壽餘  
壽後魏人封宜都王侍  
諸父兄如奴隸見本傳  
愛殺田家風景好  
杯盤妻子坐

### 庭除

僮挾琴尊子御車  
丹崖到處總堪書  
白雲有志尋華表  
黃閣無心戀綺疎  
鼓舌為名憐季子  
舍身逐利笑陳餘  
自從投綬歸來後  
荊棘胸中自翦除

### 田居自和十首

萍蓬一世百無功  
轉首俄成六十翁  
往事鏤舟求墜劍

虛名影掌悟懸弓展開明月清溪濶吹斷香風錦樹空  
托意尊鱸歸故里始知張翰是英雄

芟藁山堆畢歲功殷勤不負荷鋤翁荒村人靜泉鳴佩  
遠漢雲高月掛弓鼎鑊江湖魚苦樂枕幃園圃蝶虛空  
躬耕谷口君休笑自是沉湎一世雄

自媿明時無寸功歸來日作富家翁廉頗身老遺三矢  
陶令田荒不數弓且喜休休閒度日何須咄咄怪書空  
半牕風月山房夜卧聽松聲萬壑雄

幽居文史有新功，豈止名成田舍翁。  
六載身閒驚迅弩，百年誰謂挽強弓。  
搗殘斜照春聲急，搖碎浮雲水影空。  
歲晚苔溪恣吟嘯，不妨長作布衣雄。

新花結子樹成功，舊筍添孫竹亦翁。  
魚泳波心深避餌，鴻飛天外遠防弓。  
鳴琴欲使衆山響，宋宗少文善琴書  
好遊凡所歷山皆

圖於壁嘗曰鳴琴動操  
欲令衆山皆響見本傳詠景須令萬象空。  
彈壓鶯花戰

風月未應韜略下韓雄，后周  
名將

桔槔抽水有餘功，抱瓮區區媿老翁。  
游女執筐行采芑，

嘉賓舉爵賦彤弓溪流隔斷塵千丈雲氣遮殘樹半空  
日落昏鴉成一笑紛紛誰解辨雌雄

風虎雲龍百戰功祇堪供笑綠簑翁但能目識一丁字

見唐書張  
宏靖傳

儘勝身彎兩石弓常愛德容行讓步每憐平

叔坐談空漫郎非好居田里只為人稀易長雄

漢鮑宣  
居長黨

以地宜田牧少豪  
俊易長雄見本傳

閒來無過亦無功放浪山林一贅翁枕石醉眠松作蓋  
題詩奇中筆為弓年隨流水歸清鏡心與閒雲澹碧

空蝸角區區渾幾許寄聲蠻觸莫爭雄

稼穡無非雨露功農家分喜到詩翁勞心漫刻七年楮  
貽戚空成九載弓山展野屏隨地遠風揮天帚埽雲空

綽然到處皆佳景安得毫端句不雄

七年刻楮見列子  
九載修弓見淮南

子

政使遭逢有底功如何只作采芝翁恥迎督郵戕軒冕

後漢馬良為迎督郵毀裂  
衣冠壞車殺馬見本傳

羞拜梁奴斬馬弓

後魏乙速  
孤漢保為

漢中郡都梁奴來寇處  
不敵斬馬與弓自刎

涉世始知官至苦對花方悟色

真空高眠忽聽陂塘雨一片河聲特地雄

同諭仁本登標山

香風吹袂落巖花步盡紅雲景益佳  
龍虎郊原山障日  
鳳麟洲渚水明霞  
藍田有玉常春色  
石室無人漫歲華  
從此風煙添勝概  
老夫絕癖醉揮鴉

歸田類稿卷二十

欽定四庫全書

歸田類稿卷二十一

元 張養浩 撰

七言律詩三

讀史有感和十首

治運方開亂已隨  
陽奇陰偶見天機  
綱常壞自周秦始  
禮法傳由漢魏非  
歌鳳楚狂聲振野  
獲麟宣聖淚沾衣  
若無直筆開來世  
一脉斯文想更微

善教何心不我隨底須智力巧為機每憐鑄鐵作人謬  
更覺懸金徒木非千載舒長堯日月九重垂拱舜裳衣  
眼中龜鑑昭然在莫信攝提入太微

見武三恩飾  
奴救旱事

揖讓雍容萬喜隨紛紛攘奪費心機前車才覆後車繼  
曩日為公今日非神器果誰承正統博徒亦復著黃衣  
雲翻雨覆無從詰可是天公寓意微

季子縱橫六印隨張儀無語不投機周衰遂使諸卿顯  
孟出方知二子非豈止古今知軌範要令楊墨盡冠衣



理明天下無難事可惜時君力量微

不信忠良信詭隨於茲可灼亂亡機  
東京黨錮迷臧否西晉玄談混是非  
被禍枉投冠在地復仇空拔劍揮衣  
因知高蹈丘園者不是區區愛翠微

為善恒難惡易隨事機未晚況先機  
剥牀已及猶言穩覆鼎將空不悟非  
盡委貨財求佛果誰分藍縷到民衣  
金甌休倚完無缺只恐奇灾發隱微

作德休徵影響隨一誠端足破千機  
才如智伯才何益

智似甚弘智愈非言行但宜遵聖軌浮華且莫羨時衣  
軒然三命車中舞堪笑渠儂眼孔微

大旆高軒憂患隨可能娛樂故忘機退延多士豈遑飯  
進受羣言毋遂非任使貨盈元載物莫教鹿化士衡衣  
丈夫用世當如此不爾超然賦式微

吉凶消長日相隨此是乾坤造化機物盛則衰奚足訝  
功成者去未為非鷄鵠豈樂金石奏般鯨鳥庸錦繡衣  
試問商巖采芝叟功名何啻一毫微

政有經綸孰汝隨疎迂况復動違機久知好瑟吹竽拙  
每笑還珠買櫝非幕府高談人側目田園長往子牽衣  
分明二者安危在不信君其問子微

唐赤城居士  
司馬承禎也

### 觀物亭落成

席許池塘斗許齋  
翛然人境遠塵埃  
山容低斂煙雲起  
荷葉亂鳴風雨來  
泉石洗心無俗慮  
郊原遂意有詩材  
一生雅志今方遂  
莫作終南捷徑猜

### 觀物亭漫興二首

星斗風雲月露煙松筠梅菊蕙蘭荃天教此景全吾隱  
誰道還丹屬彼仙飯飽看山行曳杖詩成對客舞當筵  
漫郎官意從來少不為蘇卿二頃田

一亭環列萬山青奇玩寧容造物怪黃卷真懽名利外  
白頭清福水雲間農人場圃深秋畢童子薊蕘薄莫還  
碎錦滿庭苔蘚合定知無客到柴關

大暑

白戰體

帝德如天本好生誰將虐焰爍生靈乾坤卻願長為夜

物我還愁遂不醒  
玉井瑤池皆欲沸  
華門圭竇若為寧  
何當喚起龍宮睡  
一雨先秋看建瓴

和子輦學士見寄韻十首

部屋雖非綠野堂  
歸來亦用得深藏  
時雍擊壤歌堯舜  
年邁披書愛老莊  
林果簇金低薜徑  
山泉分玉注蓮塘  
無窮湖濼風煙在  
都把悠悠付坐忘

滿坐清風拙逸堂  
底須詹尹卜行藏  
淵明高躅廬山社  
摩詰真懽輞口莊  
花下車聲香覆帽  
沙頭人影玉沉塘

但行華鵲相招飲多謝山靈不我忘

佳句人傳自雪堂萬人如海一身藏騎鯨有志尋仙李  
刺虎無心效下莊高枕拂雲眠薤谷直鉤和月釣林塘  
寄聲沙鳥休飛去老子年來物我忘

時約漁樵會草堂放懷彼此各無藏泉鳴石罅心尤亮  
山闌牆頭色亦莊秋意已侵潘叟鬢春魂猶繞謝家塘  
從閒經濟心灰盡惟有詩籌未易忘

葯房蓀壁桂蘭堂無限春風此處藏山上挂絲誰夢亮

燈前角奕儘思莊聲寒風雨千竿玉色絆烟霞半畝塘  
客過不煩頻振袂紅塵名利自然忘

夢亮在北齊薛琰傳思莊見齊蕭惠

公傳

從閒距躍倦開堂聞客敲門欲辟藏世有古今皆夢境  
心無塵垢即仙莊風鳴琴筑鶯啼樹波泛水霜鶴浴塘  
六尺方牀隨意卧未應佳思此時忘

見梁賀革傳

青春回首去堂堂衰白侵尋底處藏老我癡蠅鑽故紙  
何人肥馬耀康莊翠花挾日山排闥練影翻秋水滿塘

自笑此心猶有著幾時喧寂兩俱忘

非傲軒裳畏廟堂白雲堆裏八年藏每思海上尋徐福

不願山東說鄭莊移石庭中觀岱華埋盆牕外幻陂塘

春秋六十猶為此方信童心未易忘

畏廟堂見梁阮孝緒傳

千金子坐不垂堂甘效黃陂井底藏

黃陂事見唐王孝傑傳

誰種

三槐期相位自我五柳庇山莊呢喃簾幙烏衣國蕩漾

風煙白鳥塘每到綽然亭子上今吾故我一時忘

春滿家園書滿堂是中惟許老夫藏對賓但可頻斟杜



著論何須強廢莊我愛萬山圍灤水誰言五絕出錢塘  
閒中幾度承高作故舊知君未始忘

秋日村居

衰年卜宅喜山村俗事經年不到門疎雨與秋添索寞  
遠烟因晦學黃昏倚松野叟清於鶴偷果溪童捷似猿  
莫笑吾廬太孤僻塵囂終勝市朝喧

木榻

余於綽然亭左右設木榻二蓋榆杏盤根也

一輪困離奇如虎伏一天矯促縮若螭卧而  
藏其首余愛其古為賦是詩

盤結何年出厚坤山房對列鬼潛奔龍頭深縮彌明鼎  
虎背橫眠謝傳墩作室已平梁棟用清衣猶帶土沙痕  
有時坐寐烟霞影尚覺餘春殢夢魂

書半仙亭壁自和十首

夢裏雲山久見招歸來懽若布衣交人間萬事老無味  
林下一身閒最高牧豎樵童皆我友竹溪花圃亦吾巢

英雄稅駕都如此把菊東籬豈止陶

丘園投老謝麾招相與無非莫逆交破屋帶花紅掩陋  
矮牆圍柳翠添高日明牕戶蠅蛸網風動蘭苕翡翠巢  
人境清幽塵事少詩成原不費甄陶

自携斗酒赴佳招山市江村錦翠交身健得閒方是福  
才疎辭聘本非高謀身安用營三窟容膝惟堪占一巢  
犬足生菴田里靜長官共說是劉陶

後漢劉陶為順陽  
長有惠化既代民

歌曰邑然不樂思我劉  
君何時復來安此下民

天際閒雲坐可招  
牆頭山色淡相交  
權門非貴閒門貴  
醒者何高醉者高  
搖碎庭烟風動竹  
衝開林靄鳥歸巢  
從閒精力知誰健  
豈止塵襟解鬱陶

去留心定任相招  
叔夜何須著絕交  
徂嶺有詩懷六逸

華峰無路訪三高

五代鄭遨隱居華山與二道士遊為三高

終身白刃卑頗

牧豉古清風  
仰許巢佳客  
相過適乏酒  
只談風月亦  
陶陶

莫訝漁溪不復招  
書詩正好結深交  
地寬飛鳥如爭遠

天濶行雲欲闕高，但可對山時拄笏。何須上樹縱探巢，  
王登戲人造物從今省。夷跼從來共一陶事。

可人密邇若難招，俗士紛然每易交。流水樹圍三面濶，  
遠山雲放一頭高。坐呼赤腳澆新圃，卧看烏衣葺舊巢。  
衰白太平常自賀，試聽工部詠陳陶。

才薄常慚尺一招，性孤不耐雨雲交。舉頭看鳥回頭錯，  
開口驚人閉口高。痛飲且須邀北海，劇談無用及南巢。  
逃名笑殺鴟夷子，既氏朱公又氏陶。

鄰家來往不須招吾輩寧同市道交  
鷓鴣何心爭勝負  
鷓鴣無意校低高人疑地僻如無世  
我愛民淳似有巢  
和氣春風仁壽域  
豈惟魚鳥被薰陶

達士應難折簡招  
未能數面但神交  
胸吞雲夢八九小  
氣壓太華千仞高  
綠野有雲隨杖履  
紅塵無路到枝巢  
山中宰相知誰是  
老子如今不姓陶

翠陰亭落成自和十首

一  
退愁城萬里降  
從今安堵樂吾邦  
睡殘蕙月猿推枕

吟斷松風鶴啄牕  
槁木不春從換歲  
虛舟無物任飄江  
撫尊笑向兒童道  
安得佳肴錦鯉雙

此心外物不能降  
投紱歸休父母邦  
日展樹陰濃壓地  
雲縈嵐氣濕穿牕  
詩書有感人千古  
心迹無塵月一江  
杖屨出門皆樂地  
白頭如我復誰雙

豪氣消磨壯氣降  
更無憂思到家邦  
地形蛇轉林邊路  
舍影魚驚水底牕  
工部扶衰歸杜曲  
賈生攄憤弔湘江  
懷賢政爾心無那  
何處飛來白鳥雙

無奈詩魔未易降  
頃兵堅壁鵲華邦  
古今不卷江山畫  
日月長開宇宙牕  
我愛園公并角里  
誰誇陸海與潘江  
寄聲農父須勤力  
已辦良田四十雙

錦里歸來萬慮降  
戴逵何必適他邦

晉戴逵為避微君遠依王珣

幼

思弓劍驅千騎  
老愛琴書占一牕  
分茅帶烟寒斲玉  
尋梅和月夜臨江  
漫郎誰是扁舟客  
政恐漁樵不敢雙

高岸深溝水自降  
為田初不異為邦  
鵝林影鬧斜陽屋  
蠶葉聲乾暮雨牕  
夢覺春迷天上路  
文成神決筆頭江



幽閒愛殺村居好日盡山行鶴與雙

亂山龍虎若余降誰道青山困一邦  
乏力病軀資淨几讀書老眼借明牕  
樽中竹葉能忘世枕上楊花不度江  
自覺閒來文思進未應江下獨無雙

蝸爭蟻戰一麾降春滿東秦禮義邦  
皮裏陽秋寧用鑑胸中樓閣底須牕  
吟節有興時行野博具無心盡墜江  
為謝百花潭上叟肯容分酌玉瓶雙

酒令詩籌衆所降虛名誰說可安邦  
一行鷺起滄浪水

半世蠅鑽故紙牕談塵坐招樵對榻茶甌笑與客分江  
紅塵千丈人間世此樂人間信少雙

百戰功名孰肯降須知險地是危邦一時蠻觸憐南國  
千古羲皇羨北牕老柏倚風鳴地籟亂雲翻浪溢天江  
詩因韻險還奇崛隻字真堪白璧雙

遂閒堂獨坐自和十首

鄉社優游素所甘煙霞原不責余貪山因野濶無藏碧  
水為溪窮有斷藍佳景自當書一一元機誰與論三三

歌謠聖代文田里莫道衰翁百不堪

露盤杞菊齒牙甘何必鹽梅鼎鼐貪五柳似人嚴戶牖  
百花如綬亂緋藍世傳元圃還丹九誰見黃眉洗髓三  
我道雲莊即仙境杖藜遊世四時堪

自到家鄉水亦甘蓴鱸非是季鷹貪有生不喜窺權要  
宋顏延之事無禍何慙衣縷藍數具河圖中衍五氣原太極  
內函三平生伎倆多曾慮只有調朱弄墨堪

擊鮮醢酒有餘甘種竹移花不是貪世事成殘心上火

年光絲盡鬢邊藍地環赤縣神州九

中國外又加赤縣神州者九見史記

人共山猿野鶴三六載丘園凡六名小臣何德聖恩  
堪

世味寧同酒味甘野情不似宦情貪乘舟遠遁誰如范  
拍板高歌每羨藍追狗僅能功第二卧龍竟使國分三  
英雄事業無涯苦舉似高人一笑堪

至味何嘗有苦甘大觀初不校廉貪苔垣蝸篆斜行玉  
柳岸鷺梭巧織藍飲興半吞雲夢九吟魂高繞華峰三

青編黃髮林泉下此樂惟應我輩堪

涉世誰云病叟甘祝田嘗笑野人貪稻塍降沼多蓮葉

柳岸圍村半蓼藍人馬郊行并影四

宋沈慶之以公就第獨行田園

人不知為三公后賜三望車慶之曰我每游歷有人時與馬成三無人時與馬成二安用此車遂不受風

雷霆震任呼三

後漢公沙穆隱居建成山中依林阻為屋嘗暴風震雷有聲呼穆者三讀書自

若只應瀟洒雲莊景繪畫為圖想亦堪

嚼蠟功名幾許甘從今斥競斷癡貪雲山使我心如水

富貴令人面似藍

盧飛事

幽處且同龜縮六諛言但恐虎

成三綠簾青筠真無價處處斜風細雨堪

江山天許為分甘莫訝雲莊老子貪對客不妨參玉版  
誨人政要勝冰藍管斑許我時窺一顰帶從渠日褫三  
甚欲搜詩滿千首還愁花月不能堪

老耒漱石枕流甘無意高才大燾貪二子但教皆種德  
諸生何苦為栽藍

後漢楊震少孤貧養母假地種植謀  
諸生嘗有助種藍者震見折拔去

生鬼笑營十一得白鶴驚舞再三不是身閒街詞翰桃  
人風景每難堪

宋劉伯顏歷位九卿郡守貧屢尤甚嘗  
在家慨然將營十一之方一鬼在旁撫

掌大笑伯顏嘆曰貧窮固有命乃復為鬼所笑也遂止

### 野興二首

出門游目景無窮老子惟愁詩不供流水紆青園地勢  
斜陽分綵繡山容代天理物頻澆圃為世儲材自種松  
莫視一閒為草草功名良苦且多凶

顏氏身窮道不窮一瓢何異八珍供天憐幽僻書門扁

梁沈瑀與范雲善齊末瑀就雲宿夢坐屋上仰見天中有字曰范雲宅見本傳花為衰癯照病

容雲放月波搖岫幌風將仙樂入雲松此生已付林泉

了莫向蒼龜問吉凶

王內翰哀挽

束髮耽經晚益勤  
平生精力盡斯文  
前朝十老今餘幾  
當代三王獨數君  
李賀屢煩韓愈駕  
羊曇空阻謝安墳  
玉堂寥索人何在  
落日溪牕滿白雲

歸田類稿卷二十一



欽定四庫全書

歸田類稿卷二十二

元 張養浩 撰

五言絕句

詠荷花

水府羣仙會  
紅雲擁翠霞  
黃昏不歸去  
認得老夫家

遂閒堂

蕩漾樂湖月  
氤氳華鵲雲  
是中有佳趣  
未易與人云

綽然亭即事二首

茅亭雖若小左右皆春色風霜一戒嚴惟見松與柏  
水逝月仍在山深雲不知松陰鶴立久似待老夫詩

郊飲醉歸

昨朝醉田間欲借山為枕青山不肯前却枕白雲寢

過杭州伯顏丞相廟

取宋市不易歸朝容若愚誰知六經外元有聖人徒

七言絕句

堂邑宣化堂退食

縣齋公退炷爐熏聊為塵煩一解紛開戶不教香遠去  
簾紋浮動半牕雲

行水災郊外

雲駁疎陰漏日華  
矐矐晨色散林鴉  
馬前怪底猶明月  
路轉湍川蕎麥花

綽然亭口號

十年堅卧玉溪東  
多謝山靈肯我容  
為問賞心誰是伴

抱雲挂月兩奇峰

薄暮池亭獨倚筇  
寒山遠火透林紅  
却愁今夕雲霄外  
萬疊屏風一炬空

送客郊行二首

茅屋春融桑柘煙  
地偏雞犬靜柴關  
野人不解康衢頌  
短笛一聲牛背山

牛羊散亂滿郊垌  
日暮吹煙草際生  
野老不須誇穡事  
馬頭已自見昇平

大明湖泛舟

浮空汎景泝流光  
箕踞船頭倒羽觴  
喚出湘靈歌一曲  
水雲搖蕩暮山蒼

題張古齋書室

鼎彝卣鬲夏商前  
圖畫琴書晉宋間  
席促爐熏談至暮  
落紅吹滿小重山

南口道中

巖壑秋高楓葉丹  
天風吹我畫圖間  
近來人說鑾輿過

數日香塵不見山

綽然亭十首

宦途華髮厭飄零  
一旦歸來萬慮冥  
莫道閒人無事業  
翠紅栽滿綽然亭

一亭新構僅如蝸  
但遠塵埃便自佳  
底事東風不容物  
掀簾吹落膽瓶花

自築層臺草棘間  
興來時復一躋攀  
不知老眼高多少  
脚底雲生無數山

詩書堆案小牕明  
花竹交加影半橫  
燕子日長人睡起  
一簾紅雨落無聲

山遶田園水遶菴  
遨遊隨處儘吾堪  
老來世事都無味  
惟覺林泉蔗許甘

溪毛園甲儘芳生  
野鶩河魚亦可羹  
脩食不須絲與竹  
只聽兒子讀書聲

牕影朧朧破曉寒  
卧看紅日上簷端  
雄鷄說與休多事  
老子而今不屬官

虛名常恐汨吾天一日能閒便是仙  
賓客有無何足校署門未覺翟公賢

世途覆轍日相隨不待功成也合歸  
直道遂心方說退卻疑老子不知機

裴度歸休綠野堂鑑湖曾說賀知章  
老夫何敢前賢比葦屋荒村分退臧

村居

萬山青繞綽然亭莫怪龐公懶入城  
六月人間日如火



披襟松影聽泉聲

贈李祕監

至治間曾  
畫御容

封章曾拜殿廷間凜凜丰儀肅九關回首橋山淚成血  
逢君不忍問龍顏

拜東平王拜住丞相畫像

孤忠自倚了澄清笑視羣姦不足爭壯志未酬還中彼  
披圖老淚雨如傾

夜坐綽然亭

夜深獨坐綽然亭林隙誰家燈火明鶴夢不驚人語定  
空山一派亂泉聲

翠陰亭漫興十首

池荷香冷碧雲愁林樹陰疎翠幄收老子胡牀山影裏  
擬尋詩句壓高秋

往歲歸心日夜馳而今何幸遂歸期回頭卻憶從前事  
真似邯鄲夢覺時

野人野處四三年雲擁柴關晝寂然時向東南一登眺

亂山龍虎欲來前

終日書堂足誦聲斜陽猶放半牕明硯乾旋滴花瓶水  
春逐新詩筆下生

三十年前種此林當時豈憶此投簪而今嘯傲清陰底  
未覺從前錯用心

綠瓊州渚紫金山滿目風煙白鳥閒莫道好詩無覓處  
隱然多在夕陽間

山妻中饋糝藜羹婢子兵厨取酒傾更喜小兒能養志

琅琅不斷讀書聲

兩峰華鵲奠西東老子幽居政在中可是天公相愛甚  
預為陳設待衰翁

向來山在夢魂邊今日山居掌握間我即是山山是我  
君如不信問諸山

鉛槧圖書日與偕空庭過雨滿莓苔博山煙底跏趺坐  
看得瓶花一半開

題李瓶之池亭並頭白蓮

月光月華幾何年一笑相逢寂寞邊應為湖亭風景好  
並肩來看水中天

月光月華晉新淮二女皆有闕  
色劉聰納為左右嬪見晉書

山中

朝居日日憶山中擬欲題詩偏玉峰今日好山俱在眼  
卻愁詩思不能供

題李廣犯夜圖

犯法寧論故與新無私方可見為臣竟將耐死將軍手  
誰道當年國有人

題林泉閑居圖

向在紅塵羨彼閒而今我亦水雲邊只應此日紅塵客  
卻羨吾家小洞天

題田婦紡績圖

稼穡艱難近頗知豈惟田婦獨如斯披圖不用多題品  
只寫幽風七月詩

題洛中諸公真率會圖

投老雲莊今八年我生常恨後諸賢一盃誰與同真率

江上漁樵海上仙

諸公事業照乾坤  
請老還家語語溫  
自愧無成年又未  
也辭簪紱遯荒村

為孔明解嘲

當年諸葛成何事  
只合終身作卧龍  
此前輩之詩也  
竊謂孔明之心  
與三代之佐同  
非可以出處論其高下  
故為賦此以解其嘲云

孔明雖與漢為臣  
尺寸無增只舊貧  
廊廟草廬初不

異誰言只合卧終身

過李溉之天心亭二首

久別天心水面亭  
風生吟袖喜重登  
謫仙將月游何處  
揖徧雲山問不應

放眼乾坤獨倚欄  
古今如夢水雲間  
南山也解留連客  
直送嵐光到座間

龍門

四野天門錦翠屏  
愛山直欲挾山行  
人生何必麒麟閣



大字龍門記姓名

觀含元殿故址

當時宮觀上凌霄回首陵夷半野蒿  
愛煞堯階土三尺至今猶與北辰高

詠史

至治元年余辭官歸鄉里日以文籍山水自  
娛因觀秦漢至魏晉事若有感於中者遂為  
詠史詩四十六首以見意云

齊威王

君道從來本不難  
令行惟在賞刑間  
烹阿封墨須臾頃  
便覺全齊重泰山

左師觸龍

水惟曲折海能通  
指事直言未必功  
嘗愛左師開趙后  
雍容宮殿滿春風

龐涓

縱橫才略一孫卿  
底事將軍氣未平  
只此便知優劣了

何勞樹下看輸贏

茅焦

積尸闕下欲成邱殺氣纏雲尚未收  
齊客膝行惟數語  
誰知狼虎卻回頭

李斯趙高

秦室斯高兩巨奸崎嶇心計各求安  
闔門到了歸誅滅  
本欲謾君卻自謾

呂后

婦人陰類狠淫俱故德元勳半坐誅鉤戈後來非命死

茂陵剛斷古今無

惜高祖不誅此婦也

彭越

乘危襲亂起蓬蒿千古風雲有許遭天下已平猶戀寵

誅夷休恨卯金刀

周勃

兵子何堪總百官陳平狡獪故多端明知宰輔為難事

不肯傳人袖手看

武帝

內興土木外禽荒北伐東征事擾攘自己欲多渾忘盡  
却評渾子不宜王

漢武公卿動滅夷殺心如此豈君宜他時坐盡宮中禍  
子喪孫亡實自貽

霍光

妻行弑逆子專權無乃將軍太默然女不納宮兒罪死  
也應慚愧純侯賢

汲黯

大臣懼罪日驚惶強虜聞風亦退藏底事茂陵如此氣  
不冠不敢見淮揚

公孫賀

明知漢武慘無恩相印悲持笑汝昏故使一身撓恥辱  
鼎砧未必到金門

蘇武

為臣惟命敢辭難脫遇艱難亦自安試看子卿持節處

雪花如席不知寒

主父偃

鼎食渾能幾許甜先生不避朶頤嫌他時舉族皆夷滅  
此味方知極苦嚴

韋賢

一自留侯去決然再無高士為膠弦力辭台鼎歸田里  
此日方知有此賢

丙吉

瑞氣天成五色文  
長安嶽邸閉皇孫  
護持高廟神靈在  
相國應宜不有恩

蕭望之

自省無愆任衆排  
便歸廷尉亦何哀  
當時恨殺朱雲鰲  
早是剛腸勸自裁

京房

盈虛消息理精微  
易學從來貴見幾  
箇裏懵然無所見  
區區占候是耶非



楊惲

相臣得罪息交游  
私室兢兢若自囚  
歌酒放懷非汝事  
本期行樂卻成憂

王章

浮雲蔽日黯無輝  
此際翻然便合歸  
說似獄中京兆尹  
牛衣未必下朝衣

谷永

倚中有救恐開陳  
縷數危亡在莫晨  
去旆不過交道廐

至今冤血漬京塵

息夫躬

正進猶難免罪尤况行不法望公侯區區狡計知何益  
贏得千年臭不休

彭宣

百詐千邪安漢公忠良那肯與相從勇投印綬超然去  
不信孔光無媿容

梅福

忠言無路徹宸聰  
說服深藏吳市中  
只道世間無白雉  
豈知天外有冥鴻

龔勝

解印歸來老分甘  
素衣不受一塵沾  
忽驚有詔從天下  
頓覺衰癯十倍添

劉歆

拍塞胸中書五車  
卻能委曲事奸邪  
當時似此知多少  
豈止先生可嘆嗟

王莽

桃李原無松柏心  
鴟梟強作鳳凰音  
當時一切皆從古  
底事阿衡用意深

王皓王嘉

二隱士公孫述累徵不起遂賜死

隱無真識保終難  
勢迫誰能不改顏  
愛殺蜀中兩夫子  
甘心伏劍死空山

韓歆

以直言自殺

直言為國舉朝無  
幸有緣何却見誅  
文叔襟懷乃如此

誰言高祖與同符

馬援

丈夫奇節在邊庭不願黃腸送此生底事五溪煙瘴底  
鄉居却羨少游榮

劉昆

矯情干譽世紛然才有微功即自傳滅火反風言偶爾  
此心安得不迴天

桓榮

諸生為學務明倫受印何須廣坐陳以此便為稽古力  
阿榮胸次太埃塵

黃憲

風旨言談了不聞諸君降伏每疑人乃知道義熏蒸處  
形迹俱無物自春

楊震

喜君清白羨君忠既去宜平硯礪胸半路慨然甘自醜  
先生舒卷欠雍容

李固杜喬

危邦何可一朝居二子雖忠識亦疎地下若逢楊太尉  
不須更問國何如

小人方寸足機院君子從來直道行二者早知難並處  
不如田里樂餘生

魏桓

累徵不起或勸其行桓曰后宮  
可損乎左右權倖可去乎云云

將進先思已所行所行不遂有何榮直教遇難方知止  
卻笑渠儂理未明

朱震

陳蕃友也蕃誅為匿其子事覺考掠終不肯言

交道衰微數百年死亡誰肯與周全如何當日陳蕃榻止為南州孺子懸

范滂

時危政要似愚癡出位譏評恐未宜可惜許多忠義士  
繫然俱與禍相隨

陳容

在袁紹座見臧洪甘與同死紹亦殺之

不期袁紹共生全甘與臧洪赴九泉每誦此言千載下



令人毛髮尚森然

彌衡

才如利器要深藏揮霍於人何可當自古殺身多坐此  
聖賢固不貴詞章

袁閔

為黨人潛土  
室中十八年

志士從來多苦心逃名不厭土房深弟兄妻子皆無見  
時有白頭老母臨

龐德公


鹿門佳處恣遊遨誰識沉冥一世豪莫把功名論出處  
卧龍終讓德公高

司馬懿

魏移漢祚未須臾三馬槽中已夢符天道好還良可畏  
不如為善百無虞

蔡邕

殿廷白晝墮青蛻乾道無剛政可知顧此何時陳正論  
有才無識亦堪悲



歸田類稿卷二十二